


*NZAMBÌ KÀTU*  
*ÛBÌIKIDISHA MUNTU KU*  
*CILUMBÛLWIDI KÀYI MWANJÌ*  
*KUMUDÌMWIJA DYÀMBEDI TO*

 “. . . kubìikila Banjèlò binunu dikùmi,” pàvwà umwèpelè mufwànyìne kwikala mubùtùle buloba, “kàdi Yéyè wàkafwà bwèbè wèwè ne mèmè.” Aci’s ncintu cyenzè bu cishìmikidi cìndi muswè kutèekelapu diyìisha dyànyì bwà mu dyàlumingu mu dindà, bu Mukalenge mwà kwanyisha, pa “Kilistò ùvwa cinyì?” Nènku mpindyewu tudi batèkèmène pàmwàpa ne bàna bàà bakàjì batekète aba mbafwànyìnekù kutwimbila cyàkàbìdi musambu awu, mu dyalumingu mu dindà. Mwanètù Wheeler, ncyà bushùwà ne ndi muswè kwamba ne wèwè udi bushùwà ne tuinábànzà tutekète tulenga kuntwaku, ne mvwàdilu watù, ne katùyi ne bilaabu byà kwìsù ne bikwàbò byònsò to. Bàdi ne mmwènekèlu wa beena Kilistò bwànyì mèmè, ne bìmba mùshindù awu ne bènza maalu mùshindù awu. Abi’s mbilenga byà dikèma.

<sup>2</sup> Ngeela meeji ne, mvwa ngambila mukàjàànyì ditùkù adi ne, tudi cyà bushùwà ne musùmbà wà bakàjì bàà mmwnekelu wa mankendà mwab’ewu. Ndi ngaanyisha aci’s. Nsuki yàbò mile ne kwìsù kulenga, ne bavwàle mvwàdilu wa kaneemu. Ntu—ntu—ntu nnukèma díbà dyònsò dí—dìntù mbwela mwab’ewu. Mèmè kwambila Meda ne: “Ntu muswèku kubèèlesha bònsò mulongo musangu kampànda ne kubàkwàta fòtò bwà ngaamònakù mwà kulèèja èkèleeziyà mikwàbò mùshindù wùdi èkèleeziyà wetù kaaba aka’s.” Ne mwaba wutùdi twakwila bintu ebi, bàdi—bàdi bàtùmikila. Nènku twètù tudi ne disànka. Bidi bitwenzakù cintu kampànda’s. Tudi bamanyè ne patùdi—patùdi ne dilòmba, pàdi mwoyi wètù kawùyì wùtùpùisha to, tudi bamanyè ne Nzambì ùdi ùtùumvwila.

<sup>3</sup> Mu dindà emu, mulundà wanyì kampànda, wa kule menemene ne muneemu, ùvwa mulààdika pambèlu, mwambula mufùma nendè kule ne mwikàle ànu—ànu wàmba kutùula nkinda, bèèla meeji ne mmufwànyìne kufwà mu tusunsa tukesè. Kubìikilabò, kwìsù kùkaavwa kwàmba kutòòka. Mèmè kujuuka ku bulààlù, kudyèla panshì, ne kutwàdija kusambidila mukùlumpè awu ne mvwa mukùmbàne ku ngàsà wa Nzambì bwà kulenga nyumà awu, ki yéyè udi walukila ewu. Úkaadi

muumvwè bîmpè, mwalùkile, nudi bamòne's, mucíkàle ne mwoyi pàmwè neetù dilòòlò edi, bwà butùmbi bwà Nzambi. Mmukùlumpè Mwanèètù Dauch, ne bidimu makùmi citèèmà ne bibìdi, bidimu makùmi àbìdi—makùmi àbìdi ne cimwè bisambùke pa cikondo cyà mwoyi wèndè's. Kàdi Mukalenge mmwîmpè ne mùle tètè ne luse, pa nàнку tudi ne kusàkidila bwà bwalu abu.

<sup>4</sup> Mpindyewu, Mwanèètù Neville, tudi batàngilàngàne muntu ne mukwèndè ne ndi mumanyè ne ndi ànu kakesè ne... disangisha dikwàbò bu òmwèpelè nàнку awu bwà kwikala apa, nènku neciikalè mmu dyàlumingu. Ne ncyè—ncyèna muswè kwangata mpaasàtà wanyì to, ntu ànu munangè kumutèèleja ùyiisha.

<sup>5</sup> Dyàlumingu dilòòlò pàvwàye muiyishè, ndi nnwàmbila, tuvwa babànde kuntweku ne mulundà wanyì kampànda ku cidìilù cikesè cyà bantu basùmbile mu màshinyì eci, bwà kupetakù dyàmpà dyela munyìinyi paanyimà pàà disangisha, Mwanèètù wa balùme Evans ne Mwanèètù wa bakàjì Evans, ki twètù kutuutakeena ne Mwanèètù wa balùme ne Mwanèètù wa bakàjì Sothmann kuntwaku. Mwanèètù Sothmann ne bòbò bònso bàvwa bàakula bàmba bwà diyiisha dilenga dyà dikèma adi. Kàdi, ndi nnwàmbila ne, ndi mudivùluke lumingu lwónsò elu, pabwìpì ne lwónsò mene. Kàbìdi bîmwè byà ku bivwàye mwambe byà mùdi nyuunyi wa ntuubà wèla meeji ne mmusokòme. Mpindyewu, aci ncilelèlè, pàdiye ukònamija mutù wèndè awu mu malaba, kàdi cibùungi cyèndè kacya cyàshààla patòòke. Nàнку bidi ànu bu mutùtù twenza míngà misangu's. Tudi tuteeta kusokoka mutù paanyimà pàà cintu kampànda, kutù misangu yónsò ànu . . . pàmwàpa bacikàle ànu bamwenèke, nudi bamanyè's. Yèyè's mmutùmòne kantu ne kantu, nudi numòna's. Pa nàнку ndi ngaanyisha cyòci aci.

<sup>6</sup> Pashiishe mèmè kudyàmbidila ne, èè, ndi muswè kwakulakù ne ékéleeziyà ne mèmè kudyàmbidila ne, èè, ndi—ndi... Mwanèètù Neville ùtu ne mpungà wa kuyiikilangana neenù díbà dyónsò, nàнку pàndi muneemu apa pàmwàpa ndwaku mwab'ewu. Ncyèna muswè kwikala mwena lubombo, pàndi nciyi muya ku dibìkila kampànda, anyi ku cintu nànsha cimwè to, nshààla ànu musòmbe kumbèlu eku ékéleeziyà mukàngula mwab'ewu. Ndi—ndi ne . . . Ndi muswè kwikala kaaba aka bwalu ndi munùngè.

<sup>7</sup> Ndi nnwàmbila ne, ntu menemene ànu bu... Cyuyuyuyà cyà mùneemu kaciyèna cìpetangana naanyì to, nènku ndi... ne ditunga kadyèna dipetangana naanyì to ne kapeepà kàdi mùneemu kàdi kabèngangana naanyì. Pàdi ànu kapeepà aku kàntuuta kàdi kàngenza nzajila, mubidi mujimà, nwamònu's, ne kakùyikù cintu nànsha cimwe cyùdi mwà kwenza pa bwalu abu to. Nènku ndi . . . Ne twètù katwèna tudyùmvwakù bîmpè to, nànsha umwe wetù, patùdi kaaba aka. Tudi . . . mbyenzè bu ne

nànsha umwe wa kutùdì kí mmudyũmwèku bímpe menemene to kacya ànu twáfika kaaba aka, bwalu tudi benzè bu ne tukàadi biibìdìlàngàne ne luuyà lukolè alu's.

<sup>8</sup> Kàdi, mpindyewu, cintu cìmwèpelè cìdi cìnkòka mémè m̀neemu nnwènù aba. Ncyà bushùwà, nwènù aba. Nudi bamanyè's, udi upeta balundà búngì cyanààna, ndi—ndi ne kusàkidila kwàbúngì be. Ngeela meeji ne ndi. . . bu mémè mwà kubala, bantu b̀andi mumanyè, mémè nkàayanyi, p̀mwàpa mbafwànyine kwikala mìliyò pa buloba bujimà. Musangu kampànda muntu kampànda wàkacicinka, ne p̀mwàpa mu dimanya dyà bamanyàngàna, bìpacila mìliyò dikùmi yà bantu. Kàdi kùdì cintu kampànda pa bìdì—pa bìdì bitàngilà kwètù, pa bìdì bitàngilà bantu kampànda: Kùtu ànu. . . Muntu yònsò ewu's ùtu naaci, kùtu bantu bàà pabwàbò mu nsòmbelu webè. Nudi bamanyè's, mémè ntu ngiitabuuja ǹnku. Bòbò kabàyikù to, d̀bà adi mbwà cinyi mukajèètù ngwa pabwèndè kutùdì? Ne bwà cinyi—bwà cinyi bùdì wetù. . . Nwamònu anyi? Tudi. . . bakàji bèètù, baabayèètù, ne bikwàbò, mbàà—mbàà pabwàbò's. Ne mbyà mwomumwe bwà balundà. Kùdiku cintu cyùtù ànu unangila kutwilangana naabò ne kuyiikilangana naabò. Kùtukù ànu tuntu tukesè kampànda.

<sup>9</sup> Ǹnku ndi mwà kwela meeji ku cisensè cyà kale eci mwaba wàlu èkèleeziyà mukesè ewu kwimana, ne kumpalà kwa kwimanaye mwab'ewu kapàvwa cintu nànsha cìmwè to ànu—ànu cijibajiba cyà màyi. Ki bwà cinyi njila wàwa mmutèekela lwà kwàka, mbwà kwepukayè cijibajiba aci's. Eci mu bushùwà bwà bwalu ki lupangu lwètù, ne mùsèèsù wùdì wùpicila lwà ku ciibi kwàka. Ǹnku, kàdi's civwa ncijibajiba. Ǹnku ndi mvùluka p̀mwà mpàtuka kaaba aka nteeta bwà kupeta kaaba kàà kwibakila Mukalenge èkèleeziyà, mémè mucìkàlè ànu nsongàalùme wa citende.

<sup>10</sup> Kàdi mvwa mutèlèje aba, nsongàalùme ewu ne mukwàbò ewu lwà mwab'ewu, bàsambila mu katanci emu, ne dizùka dyònsò adi's. Mémè kudyàmbidila ne: “Udi mumanyè's, kale wàwa mvwà mwà kusambila mùshindù awu, ànu bu, nciyi mmina mata to.” Ǹnku pashìishe paùdì wenda ukola, byenzè bu udi wenda utekesha ndambù, nudi bamanyè's, ne ciinè aci. Uciidi ànu wenda uya, kàdi ukàadi “mu biteshì biibìdì byà lubilu” mumvwà ngambila Mwanèètù Wood pambèlu pàapa. Kàdi, ne d̀bà adi pàcìdìbì ànu. . . Ne pashìishe paanyimà pàà cikondo udi ubwela mu lubilu lupwekèle, paùdì ufika ku bidimu bitwè ku makùmì mwandamutekète anyi makùmì mwandamukùlù, ngeela meeji. Kàdi, nudi bamanyè's, kùdì. . . ucìdì ànu wènda uya, nànsha ǹnku. Paùcìdì ànu mwà kutungunuka ne kuya, bìdì bishintulula cinyi? Bìdì bikwanga ànu d̀bà ditàmbidilakù ndambù bwà kukufika.

<sup>11</sup> Ndi mvùluka mùmwà nsambila, ne ànu mwab'ewu mu bisoosa bibì ebi, ànu mwaba ewu mene wùdì cyambilu eci

ciimàne mpindyewu ewu, ànu bu mwaba wùdici ewu, ki mwaba wúngàakabwejà kaacipànda kakesè mwaba wúmvwà mumanyè ne ngwa kutèekela cyambilu. Mukalenge Nzambì ngutu múmpèèshe kaaba aka. Èyowà's, mukalenge. Mpindyewu, ànu mu dibwe dyà mu ditumba amu mmùdì bujaadiki bwànyì bwà cikèènà-kumòna cyà mu dindà dingàakaditèèkà adi, mpâmvwà mene ncìyi mufwànyine kwela meeji dîbà adi, ne: “Ewu kî n'tabernacle webè to, kàdi enza mudimu wà mutangadiki,” mwàkambàYe. Mémè kutangila pambèlu e kumòna buloba bujimà mwab'awu, ne maulu a bleu àbàlakana, ne bantu bàfumina ku myaba yònsò; cidi cìsanganyibwa mu dibwe dyà mu ditumba mwàmwa. Ncìvwà mutàmbe kwela meeji ne aci necyènzekè to, nànsha mùvwà cikèènà-kumòna aci cyambè nànkù amu; kàdi kaciyèna cìpangilakù to, necyènzekè nànsha byà munyì.

<sup>12</sup> Ndi mwenzè miyiiki yà bàbìdì búngì cyanààna lumingu elu, bwalu, mu dyàlumingu amu, Bwikadi bulenga bwà Mukalenge bùvwa bupwèkè. Nènku mvwa ne cyà kwikala muumùke mu òmwè amu.

<sup>13</sup> Ndi ne...katwèna banjì ànu kupeta diikisha to, bàna's. Dyànyì diikisha dítu dilwa pashìishe, pashìishe ndambù. Kàdi ndi muswè kwangatakù bàna bwà ndambù wa dîbà. Bìkèngela bàalukilè mpindyewu bàye mu kàlaasà, nènku mvwa ngeela meeji ne elu lumingu lùvwa mwà kwikala cikondo cìmpè. Netùkungamanganè ne Chicago lumingu lùlwalwà elu mu masangisha awu kuntwaku.

<sup>14</sup> Kàdi pàvwà di—dilaabiibwa dyà Nyumà, mémè kudyàmbidila ne: “Mpindyewu ki dîbà dyà kwenza miyiiki yà bàbìdì edi.” Mpindyewu ki dîbà didì ebi...ndìndì mwà kwambulujakù ne ndambù wa yòyi ayi kuntwaku. Nènku kùdì...ndi mmona bamwè bàà ku bantu bàvwà mu cibambalu amu basòmbe mwab'ewu. Mbamanyè Mukalenge ní ùvwa mutwilàngàne neetù anyì to.

<sup>15</sup> Cintu cyà pabwàcì cidi...muntu yònsò pa kuumusha bakàjì kampànda bàvwà Billy mubweje ànu katancì kumpàla, inàbànzà kampànda wa ku Louisville, ùvwa ne mwànà mukesè wa bakàjì uvwa kaaba aka, Ngeela meeji bushùwà ne mbàà mu Eglise de Dieu wa mu Louisville, anyì cintu kampànda. Kàdi bwalu ne bwalu bwònsò, yònsò wa kùdìbo wàkabwela awu, kumpàla kwà mémè kuumuka kumbèlu Nyumà Mwímpè ùkaavva mungambile ne mbanganyì bàvwà mwà kwikala kaaba aka, ne bìvwàbo mwà kukonka. Nènku mvwa mfùnda pa dibèji ne wàmba ànu menemene bìvwàbo mwà kukonka abi ne nkonko yàbò mùshindù wùvwàbo mwà kuyèèla, ne mùvwàyi mwà kwandamunyiibwa. Pashìishe mvwa mwà kubàmbila, ngamba ne: “Mòna cyùvwà ànu...tàngilà mpindyewu, kwènjì ndambù wa tusunsa mwab'ewu, cidi Nyumà Mwímpè...” Ngoolola cyanza pa cibàsa ngamba ne: “Wamònu anyì? Yèyè

mmungambile cyôci eci kumpàla mene kwà wêwè kulwa.” Nwamònu anyi? Kàdi pàncivwa ànu kumbèlu apu, wàmba ne nganyi uvwa mwà kwikalakù ne cìvwà mwà kwikalakù, ne cìvwà mwà kwikala lwìdi lwèndè, ne byònsò pa bwalu abu, kumpàla mene kwà mèmè kuumuka kumbèlu.

<sup>16</sup> Nkààdi mumòna cikondo, misangu yàbùngì, cìmvwà mwà kwenda mpweka ne njila, nsambila, Mvwa mwà kumòna mulongo wà babèèdi awu wùpita kumpàla kwànyì ne mmanya dìnà dyònsò dìvwà mwà kwikala mu mulongo wà babèèdi awu, kumpàla mene kwà mèmè kufika apa. Ncyà bushùwà. Kàbìdi mmanya mene ne myaba yìvwàbo basòmbe mu èkèleeziyà ne bivwàbo... mùvwàbo mwà kwikala bavwàle ne mmwènekèlu wabò. Kwèna ukambila bantu bintu byònsò nàнку to. Wèwè... Kùdi bintu bìdi byènzekà byùdi ànu kùyì ubàmbila to. Kabyèna ne mushinga bwà kubàmbilabì to. Ndi ngambila bantu ànu bintu bìndi ngeela meeji ne nebìbàmbùlwishè, pàdi Mukalenge uncìncimika bwà kubàmbila, wàmba ne: “Ambà cikampànda.” Kwàkuswà bwà kwamba dìnà cintu cyònsò cyùdi mumòne to, bwalu aci kì ncifwànyine kwikala cìmpè to, nudi numòna’s, udi ànu... mu bushùwà bwà bwalu, udi upeta lutàtù ne bikwàbò byònsò byà mùshindù awu. Bikèngela ùmanyè mwà kupita ne bintu abi ku Nyumà wa Mukalenge.

<sup>17</sup> Nkààdikù mupetè bantu biimàne kumpàla kwànyì bangeela nkonko, yìndi mumanyè ànu bìmpè, kàdi nciyi muswè kubàmbila to, bwalu mvwa mudyumvwè ànu mwenzèjìibwe bwà kubènga kubàmbila. Nudi bavùlùke, ngeela meeji ne, cìvwa ndilòòlò dyà mu diisàtù dishààle, dìmvwà muiyishè pa: *Mwena Bùlokò* anyi? Nwamònu anyi? Nwamònu’s, pèbè muswè kwambila muntu awu, kàdi Cintu kampànda cyàmba ne: “Kwàmbi nànsha.” Nyumà wàmba ne: “Kùcyènjì to. Kùcyènjì to.” Pààbì dipà dicitàngile buludì, nwamònu’s. “Kùcyènjì to. Kùcyènjì to.” Nwamònu’s, nènku bikèngela kùcyènjì to; cyanààna udi ubwelakana ne Nzambì.

<sup>18</sup> Mpindyewu, katwèna tulwa mwab’ewu dilòòlò edi ànu bwà kwimana pàtupù kaaba aka to. Tudi baswè kuumvwa Dìyì dyà Mukalenge. Nudi basambile ne tudi bapicile mu cikondo cyà dicyònkómoka, ne—ne ndi... misangu yònsò pàntù ndwa ndi mumanyè ne ntu ndwa ànu ne kakànda kakesè kàà byena-bwalu aka bwalu mùdi... Misangu mikwàbo Mwanèètù Neville ùtu mutàmbe kwikala ne musàngèelu mwikàle ànu ùnkonka ne: “Udikù mwà kwenza *cikampànda*,” anyi “kwenze *cikansanga*,” anyi “kwakula anyi?” Nènku nkenketa mwòmò emu too ne mùndi mpetakù cyèna-bwalu cyà mùshindù kampànda ki dìbà adi tucibangila mwaba awu. Ne ndi mutwishìibwe... Mpindyewu, ikàlaayi batwishìibwe mu dyàlumingu... .

<sup>19</sup> Mpindyewu, ncyèna... Katùtukù bamanyè to, katwena mwà kwamba to. Nudi numòna’s, nkààdikù mulwe mwab’ewu misangu mikwàbo ne—ne cyena-bwalu mu meeji bwà ne

nêngààkulèpu, kàdi mfika apa ncishintulula cyònsò nkòong. Nènku nkàātu mufunde Mifundu, ngamba ne: “Nènkwatè mudimu ne cyena-bwalu eci, nènkwatè mudimu ne Mifundu eyi. Pàdibo balwa apu, nêngãmbè *cikampànda*, *cikansanga* anyi *cikankènga* aci.” Ndi mwa kufunda, cilejilu Kolintò wa Kumpàla 5:15, ne Kolintò Mwibìdì 7:1, ne Maataàyi 28:16, ne bikwàbò, kucyèlamù ànu mùshindù awu, ndwà apa nàнку, ne mfùnda Mifundu ayi. Kàdi ngiinama panshi apu, mumanya cidi Mufundù wàmbapù; míngà misangu nciyikù nànsha ncilenga to, ngàngàta njila mushiilàngàne bikolè, ànu menemene. Nènku katwena ànu bamanyè to.

<sup>20</sup> Pa nanku mpindyewu, bu Mukalenge mwà kwanyisha, ndi muswè kwakula, bwà kwoya masangisha àà mulongolongo aa kacya ngikala mwab’ewu, mu dyàlumingu mu dindà, pa cintu cyà mushinga wàbùngi. Pa nàнку, mpindyewu, nùlwayi kumpàla kwà dībà, badilongòlòle bwà kushààla too ne pashiishe ndambù, pàmwàpa too ne pa dībà ibìdì, cintu bu nàнку awu. Pa nàнку cidi. . . Ndi ne Mifundu mitwè bu ku makùmi àsàtù anyi makùmi ànàayi mimana kufunda pa cyena-bwalu aci, kàdi ndi ngeela meeji cidìci. . . cingìikalà mwà kuteeta bwà kwenza, piikalà Nyumà Mwimpè mwà kunkwàcisha, bwà kuumvwa Mukenji ne mwaba wùdiWu mpindyewu, kàdi kuWibakila ànu mwaba wùvwàWu mubangile awu, ne kuWibaka too ne mu cikondo citùdi mpindyewu eci.

<sup>21</sup> Bwà pà—pànngùmukà bwà kuya ku Chicago, dībà adi bikèngela nye buludì ku Arizona, ne pashiishe ntungunukè, ànu ngenda nya. Ne bidi mwà kwenzeka ne, bwà ku dyànyi dimanya, cidi mwà kwikala cyàkàbìdì cidimu cidi cilondà, pàmwàpa mu muvù wà luuyà wùlwalwà ewu, kumpàla kwà mèmè kwalukila cyàkàbìdì ku tabernacle, ambà ànu byenzèke ne mpicilè cyàkàbìdì mu njila ewu, bwalu ndi ne masangisha.

<sup>22</sup> Nènku Billy, mpindyewu mene, ùdi ùkwàta mudimu bwà dyàmwamwa dyà mbù bwà lwendu lwà dinyùnguluka buloba bujimà lùbangila ànu dyàkàmwè paanyimà pàà Noël. Ne ndi ne mudimu mupite bùngi too ne lwà ku ngondo wa dikùmi ne mwibìdì, ne, èè, pàmwàpa lumingu lwà kumpàla lwà ngondo wa dikùmi ne mwibìdì, ku Dallas. Nàнку pashiishe—pashiishe mu ngondo wa kumpàla tudi baswè kubangila lwendu lujimà lwà dinyùnguluka mu buloba bujimà, mu nyùngulukilu mwònsò, mwònsò nkòong, ne tudi munkaci mwà kulùlongolola mpindyewu, tujandula ànu kwàlombolà Mukalenge aku. Nènku—nènku ndi—ndi ne kusàkidila kwàbùngi kùdi. . . nànsha kùdi bantu, bambi, nànsha mùndì ngamba mbèngangana ne màngumba àbò—àbò ne bintu byà bwena abi amu.

<sup>23</sup> Nudi bamanyè’s, mu mikàndà yidì mitèèka paanyimà pààpa mene mpindyewu yàya, Mwanèètù Roy Borders ngudi utàngila bwalu bwà mabiikila awu, nènku kacya ànu ku Noël aku,

ditùkù dyà kumpàlà dyà cidimu, kùkaadi mabiikila mapite pa cinunu à pa buloba bujimà. Uh-huh. Cinunu cijimà cyà mabiikila cikaadi cifike paanyimà pààpa. Pa nàнку bikèngela Mukalenge àndudikè ne nku dyèpì dyà ku ónsò awu kwà mèmè kuya, ne cyà dyenza ciinè. Tudi ànu baMutàngidile Yèyè. Kamwèna mùshindù wà kuàngata ónsò awu to. Kamwèna mùshindù wà wèwè—wèwè kuàngata mapite pa mwandamukùlù anyi pa dikùmi mu movù wà luuyà byòbì bikèngela kwenza nàнку to, mu—mu kaabujimà... ambà ànu uya edi dilòòlò apa ne dikwàbò dilòòlò kwàka, ne aci's ki... bàdi bàlòmba mbingu yìbìdi ne mbingu yìsàtù, ne bikwàbò, anyi ntàntà unùdi ànu mwà kushààla awu, anyi bamwè bàà kùdìbo bàmba ne “ànu mwònsò mwàlombolà Mukalenge amu,” ne—ne byònsò byà mùshindù awu abi, dìbà adi kwèna ànu mumanyè menemene ne mpenyi pàà kubangila anyi ne ncinyi cyà kwenza to. Pa nàнку tudi ànu tuàtèeka kumpàlà kwà Mukalenge, twamba ne: “Mpindyewu, Wèwè twàmbilaaku, Taatù wa mu Dyulu.” Nènku nwankwàcishaayikù bwà kusambila bwà bwalu ebu, nwamònu's, nwankwàcishaayikù bwà kusambila bwà kujikija bwalu ebu.

<sup>24</sup> Ki mèmè kudyàmbidila, paanyimà pàà mumanè kwenza mudimu wà dyondopa mu dyàlumingu dishààle edi ne, dìbà adi pàmwàpa mu dyàlumingu edi twètù bangàte ànu dilongesha ne baditwàle ne baleejè ne ndìbà kaayi—kaayi ditùdi... ditùdi tusanganyiibwa edi, cidi—cidi—cidi—cidi kii—kiipàcilà pàsàtù kàà ndongamu munène wa Nzambì kacya kumpàlà kwà difùkà dyà dyulu ne buloba, ne kulwa naaci too ne ku leelù ewu, ndongamu pàsàtù wa Nzambì, ndongamu awu's. Ndi munkaci mwà kukwàta mudimu pa citùpà cyèndè ciibìdi mpindyewu, mpàtula Mifùndu, ne ngenda nkèbangana naayi ne nyitèeka pa myaba yàayi.

Mpindyewu, twànji tumonèbi, twànji twìnyikàayi mitù yètù bwà katancì kakesè cyanààna.

<sup>25</sup> Mukalenge Yesù, Mulami munène wa cikumbì cyà mikòòkò, tudi badìsangìshe kaaba aka dilòòlò edi mu Dìna Dyèbè dyà ditàmbe bwìmpè, dyà cijila adi. Tudi baKunangè, Mukalenge, ne tudi tuKwela twasàkidila bwà disangisha dyà milòmbò dyà dilòòlò edi, bwà miyengà yà èkèleeziyà mutwàyìmbi ne disànka mu myoyi yètù, ne—ne mutwàbùmvù bàbwela, bènda bàtuuta bikàshì. Ki pashìishe twètù kuya ku binù ne twètù bònsò kuKupongolwela myoyi yètù, ne kuKwela twasàkidila bwà byùdi mutwènzèle, ne—ne kuKulòmba bwà kutùngunuka ne kwenda neetù.

<sup>26</sup> Nènku mpindyewu dìbà dyàkùmbanyi dyà kubala kwà Dìyi ne bwà cintu kampàndà cyà kwakulapù, bwà kwambila bantu. Tuludikèku mu meeji ètù, Taatù, ne angàta butùmbi. Nènku ambàku cintu kampànda dilòòlò edi, kutùdi twètù eku, cyàtùkwàcishàku twètù bònsò bwà twapàtuka mwaba ewu ne

kiipàcilà kampànda mu myoyi yètù bwà kwikala ne nsòmbelu mutàmbe bwimpè ne pabwìpì Neebè kutàmba kacya kwònsò eku. Ki citùdì balwilè kaaba aka, Mukalenge, tudi kaaba aka mbwà kutàmba kuKumanya. Nènku tudi tulòmba bwà Wèwè kuvungulula buKampànda Bwebè bunène abu kutùdì dilòlò edi mu dibuulula dyà ku Dìyì Dyèbè, bwà twamònaku mwà kumanya mwà kwikala mwena—mwena Kilistò mutàmbe bwimpè ne mwà kwenza maalu mu matùkù a ndekeelu aa. Tudi tulòmba nùnkù mu Dìnà dyà Yesù. Amen.

<sup>27</sup> Mpindyewu, mèsù àànyì mmatwile pa mufùndu wà Yeshààyi kaaba aka, Yeshààyi 38. Tùbalàayi mu Yeshààyi, Yeshààyi 38.

*Mu matùkù awu Hezèkiyà wàkadi ne dísamà dyà lufù. Nènku Yeshààyi mupròfetà mwànà wa Amòzà wàkalwa kùdìye, ne wàkamwambila ne: Emu mmùdì MUKALENGÈ wàmba: Tèèka nzùbù webè mu bulongàme, bwalu neùfwe, ne kwàkwikala ne mwoyi to.*

*Ki Hezèkiyà kutàngijayè mpàla ku cimanu, è kusambilayè MUKALENGÈ.*

*È kwambayè ne: Wamvùlukakù mèmè ewu, Éyì MUKALENGÈ, ndi nkusèngelela, mùndì muvendè kumpàlà kwèbè mu bulelèlè ne mwoyi mupwàngàne, ne mwenzè cidi cimpè ku mèsù kwèbè. Ki Hezè-...Hezèkiyà kudilayè wà cibòòbò.*

*Pashùishe dìyì dyà MUKALENGÈ dyàkalwa kùdì Yeshààyi, dyàmba ne:*

*Ndàaku, wàmбилè Hezèkiyà ne: Emu mmùdì MUKALENGÈ, Nzambì wa Davidì tatwèbè wàmba, Ngùmùvù disambila dyèbè, ngàmònu binsònjì byèbè; mònaaku, nènàkidilè ku matùkù èbè bidimu dikùmi ne bitaanu.*

<sup>28</sup> Mukalenge àsakidilèku mabènesha Èndè ku dibala edi. Ncyena-bwalu cyà pabwàcì bwà diyiisha dipì mwab'ewu, ngeela meeji. Ndi muswè kuciinyika dìnà ne: *Nzambì Kàtu Ùbùkidisha Muntu Ku Cilumbulwidì Kàyì Mwanjì Kumudimwija Dyàmbedi To*. Nènku tudi—tudi—tudi ne cyà kushikuluja nshì—nshìndameenu anyì pààcì pàà kwimanyina mwab'ewu, mu mutù-wà-mwandà ewu dilòlò edi, Nzambì ùdimwija muntu kumpàla kwà kumufikisha ku lufù lwèndè.

<sup>29</sup> Mpindyewu, muntu yònsò ùdi ne cyòci eci. Tudi bafwànyine kwamba ne: “Èè, ewu muntu's mmufwè kakùyì didimwija.” To, to, to. Nzambì kàtukù. . . Kwèna mumanyè civwà mu mwoyi wà muntu awu to, kwèna mumanyè civwà cipitakana mu nsòmbelu wèndè to. Nwamònu anyì? Nzambì kàtukù ufikisha muntu ku lufù kàyì mwanjì kumudimwija dyàmbedi pa bwalu abu, ùmwambila to, ncintu kampànda, didìlongolola. Nzambì ùtu—ùtu mudìshikàmìne, ne Yèyè—Yèyè ùtu ùkookola ku mwoyi wà muntu yònsò, ùmupèsha mpùngà wa kulwayè. Mpindyewu,



mmufwànyine kudìmwijibwa kàdi kuCibènga, ne—ne kukùpa mutù ku Cyòci ne kukwàta njila kuya, wàmba ne: “Kyà, s’cidi ànu njiyà yà mùshindù kampànda, s’nényipwè mwoyi.” Kàdi, nànsha nànkù, ùvwa n’Nzambì, Nzambì mwikàle wàkula nendè.

<sup>30</sup> Ne Nzambì kàtukù mene mwà kutwàla dinyooka pa buloba kàyi mwanjì dyàmbedi kupèèsha bantu didìmwija to. Nzambì kàtukù mwà kwenza cintu kàyi mwanjì kucyàmba dyàmbedi patòòke ne neÀcyènzè to. Nènku Yèyè ùtu upèèsha bantu disungula, nènku wèwè udi mwà—udi mwà kwenza cimpè anyì cibì. Kì Wendè...Nwamònu’s, Nzambì kàtukù mwà kushintulula ngiikàdilù Wendè—Wendè nànsha. Ndongamu Wendè kènàku mwà kushintuluka ku cyàkabangàYe naaci to, bwalu Yèyè kèna ne mikàlù to ne ndongamu Wendè ne meeji Èndè mbipwàngàne byònsò. Pa nànkù, bu Yèyè mwà kuBishintulula, aci’s ncifwànyine kuleeja ne mMusàkidile dimanya. Nènku, mwikàle kàyi mikàlù, Yèyè kèna mwà kusàkidila dimanya to. Dipàngadika Dyèndè—Dyèndè dyà ntwàdijilu—Dyèndè dyà ntwàdijilu dítu misangu yònsò ànu dipwàngàne, ne kakwènàkù cidì mwà kuDishintulula to. Nwamònu anyì?

<sup>31</sup> Nzambì, kumpàlà mene kwà muntu kutèekiibwayè... kupetayè mpùnga wa kwenza bibì, Nzambì wàkamutèèka pa mwaba wà mufwànyine kwitaba anyì kuvila, mufwànyine kwakidila anyì—anyì kubènga kwakidila.

<sup>32</sup> Twàmbebì ne, byòbì biinè, bu mwambi awu kaaba aka, Mwanèètù Baker, ngeela meeji ne ùvwa mu—mu miyiiki yà bàbìdì ayi ditukù adi’s, Ndi mupetè nkonko yèndè yivwàye mumfùndile pa dimiinu dyà nyòka. Ndi naayi mitèèka lwà paanyimà apa patùdì twakulangana apa’s. Pìikalàye mwab’ewu, mòna’s, èè...Ncyèna mmumòna kaaba nànsha kàmwè bwà mpindyewu to. Kàdi yidì apa. Yèyè ne mukàjèndè, muntu mulùmè ne mukàjì bàà maalu malenga matàmbe, kàdi bóbò—bóbò kabàvwa mwà kuumvwa tùmwe tuntù pa dilongesha dyà dimiinu dyà nyòka to, mùdìbì ne—ne...yimwè nkonko pa bìmvwà mwambè, ne—ne mayiisha mapite apu kule ne kule, ne—ne kwakula pa di—diimita dyà difù ne bikwàbò. Kàdi ndi...dìbà adi bìdì ànu bu mwanèètù awu, muntu wa maalu mimpè, mwena Kilistò wa kùkaadi bidimu ndambù anyì bibìdì, kàdi kàvwa ànu muumvwè to, nudi numòna’s.

<sup>33</sup> Mbikolè paùdì kùyì...Bikèngela wèyemenè Nyumà Mwímpè bwalu Bible ewu mmufunda mu tusùmù. Kwèna ànu mwà kusòmba kàdi kuMubala bu cibèjibeji to. Mbisokoka. Èyowà’s, mukalenge. Mmunyi mùdiku mufwànyine kubingisha Nzambì pàakambilàYe Mòsà kuntwaku, wàmba ne: “Mpindyewu, kanwènji mpìngù misonga to,” mu mèyì Èndè matùma amu, “kanwènji cintu nànsha cimwè cifwànàngàne ne cyà mu Dyulu, ne Mwanjelo nànsha—nànsha umwe, anyì nì ncinyi cikwàbò, kanwènjikù mpìngù misonga to,” kàdi nànsha

nànkù ànu mu dyôdi ditùkù adi kumwambila bwà kufwimba Banjèlò bàbidi bàà cyamù cyà kabanda ne kubatèèka pa nkwaswa wa ngàsà mene apu, pàdi luse lùsanganyiibwa apu? Nwamònu anyi? Bikèngela ùmanyè Nzambi ne Ngiikàdilù Wèndè kumpàla kwà wèwè kuumvwa Dìyi Dyèndè. Yèyè—Yèyè—Yèyè ngudi ne nsapì yà Dìyi adi, Yèyè mwinè, ne Yèyè—Yèyè ki Umwèpelè udi mwà—mwà kupita naaDì ne kuDìkàngula, ne pa nànkù Yèyè ki Udi ne cyà kuDìbuulula.

<sup>34</sup> Nènku mpindyewu, tudi tujandula ne Ngiikadilu Wèndè, ùvwa, mwab'ewu, wa kudìmwija misangu yònsò muntu kumpàla kwà dinyooka, kudìmwija ditùnga kumpàla kwà dinyooka, ne bikwàbò. Ùtu misangu yònsò ànu ùfla didìmwija Dyèndè, citùvùlwiji, cyà bujitu butòòmekela. Tudi bambùle bujitu, ne Nzambi mmutùtèèke pa buloba apa bwà kabingilà kampànda, ne kabingila kàdiYe mutùtèèkèle pànwapa, tudi bambùle bujitu kùdiYe bwà kabingila aku. Bivwa bikèngela wèwè kuya kùdiYe bwà kujandula cìdiYe muswè bwà wèwè kwenza. Nwamònu anyi? Pawikalà kùyi. . .

<sup>35</sup> Wèwè muyè kenzela muntu mudimu, ne yèyè kukupèèsha mudimu mu citùpa cyà buloba mùdibo bàmuna nyama, anyi cintu kampànda, kàdi wèwè upàtuka ànu cyanààna uya ku diyeebà uya kasòmbamù cyanààna, wamba ne: “Èè?” Nwamònu's, udi ne cyà kuya kamukonka cìdiye muswè bwà wèwè kwenza, ne pashìishe kucyènza. Wèwè wenzela muntu mudimu, jandùlà byùdi ne cyà kwenza.

<sup>36</sup> Ne pashìishe piikalà mwoyi wètù pa—pa buloba apa, dībà adi bivwa bikèngela tuye kùdi Ewu Udi mutùtèèke pànwapa awu, ne kukonka ne: “Mukalenge, Udi muswè ngènzè cinyi? Ncinyi—ncinyi—ncinyi cìndi ne cyà kwenza? Ndi pànwapa bwà cinyi?” Nì mbwà kwikala maamù wa nzùbu, musukudi wa màlòngù, nì mbwà kwikala. . . Cyònsò cìdi Nzambi muswè bwà wèwè kwenza aci, dībà adi wèwè cyenzà ne mwèbè pèèbè mwònsò mùdi mumanyè mwà kucyènza amu. Nànsha wòwò mukesè bìshi, nànsha wòwò mukesè bìshi, udi ne cyà kuwènza.

<sup>37</sup> Wèwè udi wamba ne: “Èè. . .” Lutàtù lùdiku, ndwà ne, yònsò wa kutùdi mmuswè kwenza mudimu wa muntu mukwàbò. Twètù bònsò tudi baswè kwangata ndundu, mutùtù twamba, nudi bamòne's.

<sup>38</sup> Bu mùdi dībà dyà ku dibòko edi, mpindyewu, kaamusaalu kònsò mundà amu kàdi ne mwaba wàkù. Mpindyewu, katùpà kààdi kònsò kakèèna mwà kwikala kalonda to. Mpindyewu, mèmè ndi ntàngila ànu tulonda atu bwà kumòna dībà ditùdi. Kàdi kàmwè kàa ku tukàta tukèsè atu kòkò kuumùke pa mwaba wàkù, kadyàkuleeja dībà dijaalàme to.

<sup>39</sup> Nènku ki mùdibi ne bantu nànkù. Tudi bònsò, Mubidi wà Kilistò, bikèngela kwikalabò pa myaba yàbò, mu dipetangana. Nwamònu anyi? Ne dībà adi tudi mwà kukènzakana ne kumòna

ne ndìbà kaayi dyà ditùkù ditùdi. Nwamònu anyi? Pashiishe bàà pa buloba bàdi bàtàngila bwà kumòna ne ncinyi. Nwamònu anyi? Nwamònu anyi? Kàdi bàdi bànùtàngila nwênù. Ne nànsha wêwè mwikàle ànu kaaressort kàà kakesè bu kasukì, anyi ressort wa munène, anyi cyònsò cyùdi aci, enza mudimu ne mwèbè mwònsò múdi mwà kwenza amu.

<sup>40</sup> Mpindyewu, bwalu, tudi bambùle bujitu butùdi ne cyà kulumbulwila kumpàlà kwà Nzambì dīngà ditùkù. Muntu yònsò udi mulwè pa buloba apa ùdi ne cyà kulumbulula kumpàla kwà Nzambì bwà bujitu bùdiye mwambùle. Nènku, bwà bààbùngì bèètù, buumùcyùngà, mbutùdi ne cyà kulumbulwila. Twètù... Bujitu bwambula ebu mbuumùcyùngà butùpèèsha kùdi Nzambì, nànsha ciikàle cinyi. Ànu mūngāmbi kùkaadi katanci ne, “mukàji wa nzùbu,” dībà adi ikàlà mukàji wa nzùbu mushùwashùwàlè. Ncyà bushùwà. Byòbi bikèngela kwikala cidimè, ikàlà cidimè mushùwashùwàlè. Cyònsò cidi Nzambì mukutèèkèle bwà kwenza, udi mùcyùngà wa cyòci aci, nebikengelè ùcilumbùlwilè kùdi Nzambì, bwalu bìdi bikèngela bintu byònsò ebi bwà kucyènza.

<sup>41</sup> Bàakambila Hezèkiyà bwà kudilongololayè ne kwikala mudilongòlola bwalu ùvwa ne cyà kutwilangana ne Mufùki wendè. Mpindyewu, Hezèkiyà ùvwa mfùmù, ne muntu mu—munène. Nudi bamòne ditèndakeena dyèndè mwab’ewu anyi? “Mukalenge, ndi nKusèngeleela bwà ùntwekù musinga. Ndi—ndi mwendè kumpàlà Kwèbè ne mwoyi mupwàngàne.” Bujaadiki kaayipu ku—ku—kutùdi twètù leelù ewu’s wè, ne bìvwa bikèngela nànkù, muntu udi wenda kumpàlà kwà Nzambì.

<sup>42</sup> Nànsha lufù mene lwàkambiibwa bwà muntu ewu kàdi Nzambì wàkashintulula meeji Èndè bwà bwalu bwèndè, bwalu Hezèkiyà ùvwa muswè kwenza cintu kampànda ne Nzambì mmwambè ne Yèyè “neatùpèèshè majinga a mwoyi wètù.” Ki cikondo cyà Hezèkiyà kulwaci, ne yèyè—yèyè kupeta kànsèrè, anyi cintu kampànda, ki—ki kucibiikilabò ne “ncyùjà” mu ditùkù adi, kàdi twètù tudi bamanyè ne byùjà pa ciibidilu kabyèna bikùshipa to, bitu ànu byòndopiibwa. Kàdi pàmwàpa cívwa nkànsèrè, ne kabuulùle mukana byènze bu cyùjà. Ki—ki Nzambì kwambila Yeshàayi, wàmba ne: “Ndà kuntwaku ùkamwambilè ne neáfwe.” Kàdi Hezèkiyà ucívwa ne cintu kampànda cicívwayè muswè kwenza. Ùvwa ne—ùvwa ne... .

<sup>43</sup> Paùdi utèndakeena Nzambì bwà cintu kampànda, bikèngela wikalè naaci ne kabingilà. Bìdi ànu bu Mufùdu ewu wùntù misangu yàbùngì ntèela ne: “Wèwè mwambile mukùnà ewu ne: “Tentèmùkà,” ne kùyi wela mpatà to, kàdi witabuuja ne ciwàmbi aci necyènzekè, udi mwà kupeta ciwàmbi aci.” Mpindyewu, aci cidi mu kaabujimà cikòntononyiibwa pa kabingilà ne kiipàcìlà, nwamònu’s, bwà cyaànà kacyàkwenzeka to. Nwamònu anyi?

44 Kwéna ànu mwà kupàtuka pambèlu apa. . . Ki mwaba awu's wùdi bààbùngì bèètù benzela bilèmà byàbùngì, bàdi bàpàtuka bàmba ne: “Mpindyewu, nènkuleejè ne ndi ne diitabuuja dyà kwenza cikampànda.” Mpindyewu, udi mupùile ànu kwìnè kwònsò aku. Nzambi kèna ùkupèèsha mapà bwà kunàya ànu naawù to.

45 Ànu muumvwà ngamba kwènjì katanci, Yèyè kèna ùkuleeja bìkèèna—kumòna ànu bwà kunàya naabì to. Kì ncintu cyà kunàya naaci nànsha. Mbyà cijila. Kwàta naaci mudimu ànu mu. . . mwikalà Mukalenge mwà kukwanyishila amu. Ikàlà kùdiYe bu mwena bùlokò. Nànsha wèwè uswa kwambila muntu awu ne mmupùile bishi, ne cikampànda, cikansanga, anyì cikankènga, shààla mupùwe too ne pàmbà Nzambi nànkù. Pashiishe pàdi Nzambi wàmba nànkù, díbà adi udi mwà kulwa ne EMU MMÙDÌ MUKALENGE WÀMBA! Kabiyi nànkù to, cìpwè wèwè ànu mwoyi.

46 Bu—buloba leelù ewu bùdi ànu mùvwa Hezèkiyà musangu awu amu, mbumana kudìmwija. Bùdi díbà dyònsò edi munkaci mwà kudìmwijiibwa. Èkèlezìyà ùdi munkaci mwà kudìmwijiibwa. Nènku, mpindyewu, bintu ebi kabyèna byènzeka ànu ku—ku mpùùkàpùùkà to. Bìdi byònsò ne cintu kampànda paanyimà pàabi.

47 Mpindyewu, Hezèkiyà, mwikàle ùsaama, mwikàle ne cyùjà eci, kabivwa ku mpùùkàpùùkà to. Nzambi wàkatùma Yeshààyi kuntwaku ne kumwambila bwà kutèekayè nzùbu wendè mu bulongàme mpindyewu bwalu yèyè ùvwa ne cyà kufwà. Ki Hezèkiyà kudìlayè mwadi, ne kwambilayè Nzambi ne: “Ndi mwendè kumpàla Kwèbè ne mwoyi mupwàngàne nènku ndi—ndi nKulòmba bwà ùlamèku mwoyi wànyì bwà kabingilà kampànda, kabingilà kimpè, kabingilà kàà Nzambi.”

Nzambi wàkambila mupròfeta, ne: “Alùkilà ùkamwambilè.”

48 Mpindyewu aci kì nyà cikèmesha anyi? Hezèkiyà nguvwa muntu wa mutàmbe bunène mu ditùnga amu. Nwamònu anyi? Hezèkiyà nguvwa mfùmù, ne muntu wà difwàna dyà Nzambi. Ùvwa muntu wa bushùwà, bu muvwàye mwà kutèndakana bwà aci kumpàla kwà Nzambi ne Nzambi kàyi mumudyulè to bwà ciinè aci pàakambàye ne: “Ndi mwendè kumpàla Kwèbè ne mwoyi mupwàngàne” apu, mpindyewu aci's cìdi cyàmba byàbùngì be. Nwamònu anyi?

49 Ne Nzambi kàakambakù to ne: “To, Hezèkiyà, kùvwa mwenzè nànkù to,” kàdi Wàkiitaba ne wàkacyènzàye cyà bushùwà. Ki Yèyè ne: “Nèngìikalè mwà—Nèngìikale mwà kulama mwoyi wèbè ne kuwùlepesha ndambù.” Nwamònu anyi? “Nènkupèèshè dilòmbà dyèbè,” nwamònu's, bwalu ùvwa muntu mwakàne, ùvwa mu—musadidi mulelèlè wa Kilistò.

50 Ne díbà adi tudí tudyùmvwá ne tudí ne bukenji bwà kulòmba cintu kampàndà pìikalà—pìikalà kiipacilà kèètù kajaalàme, ne pashìishe ne kabingilà kèètù kàà cyòci aci.

51 Mpindyewu, tudí tumòna leelù ewu ne bidimu byàbúngì bishààla ebi, ndi mufwànyine kwamba ne dikùmi ne bìtaanu bishààla ebi, anyi bipite apu ne, díbà dyònsò kùkaadi didìmwija mu ditùnga dijimà emu ne: “Nyingàlálàayi, bwà cyanààna nufwàfwa!”

52 Nudi numòna’s, mvwa nyiikilangana leelù ewu ne mukàjàànyì ànu pa bwebwebwe mu dindà emu, ki mémè... pa dindàdindà ku didyà dyà dindà, tuvwa basòmbe ku mèèsà aku tuyiikila kumpàlà kwà mémè kuumuka. Mémè kwamba ne: “Mukàjàànyì...” Òvwà wàkula bwà Billy Graham, ne bwà mukàjàndè, mùshindù mwine ùdibo bàteeta kwikala ne nsòmbelu mupeepèle ne bikwàbò. Mémè ne: “Awu mmusadidi mulelèlà pàdiye kàyì ùteeta... pàdiye... muntu pàmwàpa ùpeta miliyò yìbidì anyi yisàtù ku cidimu mu tùmpanyè twèndè, kàdi kàyì ùyàngata to, cisùmbù cyèndè cìyàngata, cìyààluja ku mudimu ne ku tudyòmbà, ne bikwàbò. Kàdi Billy ùtu ùpeta binunu bitwè ku makùmi àbidì ne bìtaanu ku cidimu.”

53 Kwambayè ne: “Mmunyì mùdiyèkù mufwànyine kutùùla binunu makùmi àbidì ne bìtaanu ku cidimu?”

54 Mémè ne: “Yèyè—yèyè ùdi wàngata ànu bidì bikèngela bwà kwangatayè abi, kwàjiki. Ùdi ne nzùbu wa difucila, ne bikwàbò byònsò.” Mémè kutùngunuka, kwamba ne: “Mémè ntu ne kaneemu kààbúngì bwà Billy Graham,” mungàmbì, “bwalu ùdi ne mukenji, ne mwinè mukenji awu ngwà kanyinganyinga.”

55 Nènku díbà adi, ndi nzwàmbila ne, kakwèna muntu nànsha umwe ùndìkù mumanyè, udi mu ditùnga leelù ewu, udìku Nzambì mukwàte nendè mudimu ne mukenji awu bu Billy Graham nànsha. Kaa, yèyè mmuwùshikùlùje, ne ùdi wimana ànu mwab’awu ne, ndi nzwàmbila, yèyè ùdi ùbìikila beena cìdìdì ne bidimba byà èkèleeziyà abi ku kanyinganyinga. Kàdi ki pèndè pàdiye ùshìikidila’s.

56 Kàdi ki Mwanèètù Oral Roberts ulwàlwa ewu, mukwabo musadidi munène wa Mukalenge. Ne kakwènakù muntu nànsha umwe ùlwa wa kufwànyikija ne Oral Roberts nànsha. Dikwàtà dikolè dyà mulùm’a nyama dyà—dyà ànu kwipata kwà nyumà mibi ne kusòkà kwà Dìna dyà Mukalenge adi ne—ne tuumasaluka tukesè atu, ne bikwàbò, pa dyondopa dyà kùdì Nzambì. Aci’s ncyà bushùwà menemene. Ki mùsànjeelà mutùmina beena Mpenta nyèyè awu.

57 Ki mùsànjeelà mutùmina èkèleeziyà wa cyena-màngumba nyaawù, nwamònu’s, ne beena bisùmbù byà bikwàte mashikà.

58 Kàdi pashìishe kènzakanàayi mu mudimu wetù mupwekèlè wa bwambi ewu, mwimàne “Yèsù Kìlistò umwèumwè awu makèlèlè, leelù, too ne kashidi,” nudi numòna’s. Awu wùdi

wènza cinyi? Wùbiikila kasumbù kàà Mukàjì-musèla aku, nudi numòna's. Nwamònu anyi? Nwamònu's, wùdi—wùdi wùbiikila bwà kupàtuka mu bisumbù bibìdì abi. Wùdi wùpàtula Lukàtà munda mwà lukàtà. Nudi numòna cìndi njinga kwamba aci anyi?

<sup>59</sup> Ne díbà adi Nzambi's ùdi ùshìndika mukenji wùdi Billy Graham ùyiisha awu. Nzambi ùdi wòndopela babèèdì ku masambila à Oral Roberts. Ne Nzambi ùdi wènza bintu bìdì Yesù. . . ùjaadika ne Yesù Kilstò ùdi umwèumwè awu makèèlèlè, leelù, too ne kashidi. Ne wòwò wùdi wùbiikila bintu abi bwà. . . Mmikenji yà díb'edi's. Ne wònsò wà ku mikenji ayi wùdi wùbiikila ne: “Nyingàlàlaayi, anyi nudi nubùtuka!” Ncyà bushùwà. “Nyingàlàlaayi, anyi nudi nubùtuka!” Kakùcyèna ditèkemena to, dyònsò dikaadi diyè. Bàà pa buloba mbadimwìjìbwe bwà Dilwa Dyèndè. Wònsò wà ku mikenji ayi wùdi wàkula ne wùdimwija bwà Dilwa dyà Mukalenge Yesù, ne kùdì èkèleeziyà wa cyena-màngumba. . .

<sup>60</sup> Vùlukàayi ne, Nzambi ùtu misangu yònsò ànu mu yisatu. Bu Taatù, Mwànà, ne Nyumà Mwìmpè; ne dibingishiibwa, ne dibàt-. . . ne dijidiibwa, dibàtiiza dyà Nyumà Mwìmpè; ne bikwàbò; Yèyè ùdi mu yisatu.

<sup>61</sup> Mpindyewu, Nzambi ùdi mukenji wà kanyinganyinga awu bwà èkèleeziyà wà ku dínà. Nzambi ùdi mu mukenji wà dyondopa dyà kùdì Nzambi awu bwà èkèleeziyà wa cyena-Mpenta. Nzambi ùdi mu Mukenji bwà Mukàjì-musèla. Nwamònu anyi? Nàнку tudi tujandula ne bònsò bàdì bàbiikila, muntu ùbiikila *eci*, ewu ùbiikila *cyàcyà*, ne wàwa ùbiikila *cyàcyà*. Nzambi ùbiikila èkèleeziyà bwà kupàtukayè mu bàà pa buloba; kùdì. . . ùbiikila èkèleeziyà mu èkèleeziyà wa ku dínà bwà kubwelayè mu Mpenta; ne ùbiikila Mukàjì-musèla bwà àpatukè mu Mpenta. Nwamònu anyi?

<sup>62</sup> Ànu bu Luther, Wesley, ne mpindyewu. Nwamònu's, cìdi cyònsò ànu cileejìbwe mu cimfwànyì cipwàngàne ne kakwènakù kalèmà nànsha kamwè to. Ndi mulengè ntengù yàcì yònsò, ne nseke yàcì, ne munda mwàcì ne pambèlu, ne mucileejè ku Mifundu, dilondangana dyàcì, too ne mutwàmanyì kakùyi mpatà to ne m'Bulelèlè. Nwamònu anyi? Kakwèna kalèmà nànsha kàmwè to. Mu dyàlumingu ndi ntèkemena ne Nzambi ùdi ùcìbweja mu ndòndò menemene bwà kanwìkadikù bafwànyìne kuya kule naacì to. Nwamònu anyi?

<sup>63</sup> Mpindyewu, Nzambi ùfla didimwija ne: “Dìlongòlòlè bwà cilumbulwidi.” Maabòmbè à mushindà àdi mu bitanda byà bilaminyi, byònsò bimana kulongolola. Nènku Nzambi, kumpàlà kwà kulekelaYè cintu eci cyènzeka, Ùdi ùtùma dìbiikila panshì pònsò, ànu mwàkenzàYe mu Sodomà amu ne: “Pàtukààyimù. Dìlongòlòlaayi. Kùdì cintu kampàndà ciikalà mwà kwenzeka.”

64 Ànu bu mu matùkù a Noà, kumpàlà kwà Nzambì kutùma mâyi bwà kubùtulawù buloba mu cikondo cinènè cyà kumpàlà kwà mvùlà yà Noà cyàkalwà kubwela mu mpèkaatù aci, mwàkàmbà Yesù patòòke ne cívwa nditùkù difwànàngàne ne edi. “Ànu mwàkadìbi mu matùkù a Noà, ki mwikalàbi kàbidì ku dilwa dyà Mwànà wa muntu.” Mùvwà bakàjì batombòke, ne—ne bàsèdiibwa ne bàsèlesha bânà, ne—ne byenzedi binènè byà bulòbò byà maalu à mamanya, ne beena meeji matwè bàà balongè tùlaasà abu baditwe ku luseke lwà mamanya à mu mitù, kàdi Kasùmbù kakesè kapwekèle kàà mikòòkò kasòmbèle kule ku luseke kindile cilumbulwidi cívwa cilembèlèle ne dipànduka. Nènku kumpàla kwà Nzambì kutùmaYè cilumbulwidi aci, Wakatùma mupròfetà. Um—hum.

65 Ànu mwàkenzelàYe Hezèkiyà amu, kwambaYè ne: “Dilongòlòlè, bwalu manyooka àkaadi pabwîpi ne kudikùma.”

66 Ki kulongololayè bantu bwà dîbà adi. Noà wàkalongolola bantu, ne cívwa ndibìikila dyà luse kumpàla kwà cilumbulwidi.

67 Niniwà wàkamanyishiibwa kumpàla kwà dîbà dyàbò adi. Nzambì kupwekeshaYè mèsù pa Niniwà, ne kwambaYè ne: “Ndi—Ndi ngumvwa ku mwoyi kùngenda ne nucyòke bwà maalu aa.” Ndi—ndi—ndi ngumvwa ne—ne kùdi...nànsha mùvwà buloba bunènè bwà bampàngaanù, bwà Bisàmbà byà bendè abu...Cimenga cyàbò, mùvwàci mu matùkù awu amu, bàakabalumbulwishila ku cimenga aci; mpindyewu nku matungà, mpindyewu paanyimà pàà bantu bamanè kutangalaka mùkaadibo batangàlàke emu. Yèyè ne: “Cimenga cinène aci ncidifile, mu kaabujimà, ku mpèkaatù.”

68 Nènku Nzambì, kumpàlà kwà kutùmaYè dinyooka, Wakatùma mukenji wa didimwija ne: “Pàtukàayi muntwamu! Dilongòlòlaayi!” Tàngilàayi ne, mupròfetà kààkambakù cintu nànsha cimwè to ànu—ànu bwà kupeta...Wàkamba ne: “Munda mwà matùkù makùmi ànaayi cimenga eci necìbutudiibwè.”

69 Kàdi, kaa, mùtùbi misangu mikwàbò bikolè bwà kwenza maalu bu nàнку, bwà kwambila bantu’s. Mupròfetà yèyè kàyi mutàngile bimpè to, neàbwelè mu lutàtù, bwalu neénzè bu muneemènène ku luseke, ùteeta bwà kucìpeepeja, anyi kudya cibàngà ndambù apa ne ndambù pààpa. Kàdi mupròfeta mulelèlè ùdi ne díyi ditùma kùdi Nzambì, kabívwa bikèngelakù bwà yèyè kudya cibàngà pa cintu nànsha cimwè to, kakùyì mpatà to bìvwa bikèngela bwà kucyàmbayè ànu mu cyòci.

70 Ki bwà cinyi Yèyè mmukwàte mudimu ne nyumà wa Eliyà bikolè, nwamònu’s, mbwalu nyumà awu ùvwa misangu yònsò ànu ukùmbaja mèyi Èndè matùma. Nudi numòna anyi? Nwamònu’s, ùvwa ùtwàla mèyi Èndè matùma ànu menemene mùvwàWu amu, ne misangu yònsò ànu “Dyalukila ku Díyi!” Nwamònu anyi? Misangu yònsò ànu dibààluja ku Díyi.

<sup>71</sup> Mpindyewu, tudi tusangana Ninìwà mu mpèkaatù. Ne mupròfetà ùvwa wèlakana bwalu bùvwa mbuloba bwà bàà Bisàmbà byà bendè, nwamònu's, divwa nditùngà dyà bantu bàà Bisàmbà byà bendè, bantu bàà Bisàmbà byà bendè; kaciyi cyabò bóbò to, kabàvwa beena Ebèlù to. Bàvwa bàà Bisàmbà byà bendè. Màzuwà manène a màyi, dilobo dinènè dyà mbù dyà dyendela mishinga òvwa Ninìwè, cyàpù cinènè cyà dilòbà dyà mishipa kuntwaku, bantu bàlòbakù. Nènku—nènku bàvwa—bàvwa ne. . . cìvwa ne cyà kwikala ne ditùngà dinènè dyà mpèkaatù kuntwaku. Mfrangà búngì cyànaàna; kàdi—kàdi mwaba wùdì mfrangà tètè mu nzùbu tètè pambèlu, ne bantu biikàle mu mmwènenu wà luumù wa leelù, ki mùtù mpèkaatù ùsòmba misangu yònsò, ne cikisu.

<sup>72</sup> Bikaavwa bicyòkèshe Nzambì. Pa nàнку Yèyè ùvwa ne mupròfetà mu ditùngà amu, ki kwambilaYè mupròfetà Wendè awu ne: “Ndà ku Ninìwà kwàka wèlè lubilà lukolè, wàmbè ne: ‘Munda mwà matùkù makùmi ànaayi cimenga eci necibutudiibwè.’”

<sup>73</sup> Mpindyewu mpindyewu Yona kudyàmbidilayè ne: “Udi mumanyè's, ndi mufwànyine kupeta lutàtù ndambù.” Pa nàнку kuswàye bwà kutàmba kutwishiiwà, ki kudyàmbidilayè ne ùvwa mufwànyine kupetakù kaadiikisha kakesè nènku—nènku kupwekakù ku Taashishì. Ki twètù kujandula ne kùdì. . . kùvwa kushààle matùkù ànu makùmi ànaayi cyanààna. Nwamònu anyi?

<sup>74</sup> Pa nàнку Mukenji ngwà lùkàsàlùkàsà, cikondo cikaadi pabwìpì. Kwikadi unàya ne bikwàbò bintu byà kupeta dipòlomè dyà Licencié ne kujandula cintu kampànda to. Dìbà dikaadi pabwìpì! Ki lutàtù lùdì naalù bantu leelù ewu ndwòlò alu, tudi tuteeta kwibaka bilongelu binène ne kwikala ne bintu binène byà mùshindù awu. Pàdi luse. . . Ekèlekèle! Patwikalà tuyiisha Dilwa dyà Mukalenge, bidi bitùkèngela bilongelu bwà cinyi? Bidi bitùkèngela kanyinganyinga kùdì Nzambì! Nwamònu anyi?

<sup>75</sup> Ànu mwàkambilàbo mpàndànjilà wa citende awu kùdì Hudson Taylor, kwambayè. . . Anyi, nsongàalùmè wa ba-Chinois mulwè kùdiye, wàmba ne: “Mukalenge Taylor,” yèyè ne, “Mukalenge Yesù mmunguujè ne Nyumà Wendè.” Yèyè ne: “Ndi—ndi ne disànka dyàbúngì be!” Yèyè ne: “Nebikengelè bwà ngènzè bidimu dikùmi mpindyewu bwà mèmè kupeta màpòlomè àanyi ne bikwàbò anyi?”

<sup>76</sup> Yèye ne: “Mwanàanyi, kwindidi byà màpòlomè to. Kandèyi kòkò kateemesha, ndà ùkaCyàmbè! Ndà ùkaCyàmbila bantu. Kwindidi byà màpòlomè abi to. To. S'neùbutukè cyà bibidì cijimà kùyì nànsha mwanjì kujikija to, ne miinè màpòlomè èbè awu.”

<sup>77</sup> Twènza, pàdiku kateemesha apu, wèwè kùyì mumanyè cintu cìkwàbo nànsha cìmwè to, londèlàngà wèwè ànu



mwàkateemàku amu. Kàdi kùteeci ànu—ànu bwà kwangata kaaba kàà mûngà muntu, anyi kaaba kàà cintu kampànda to. Wêwê mucimanyè, londèlàngànà wêwê ànu cyùdì mumanyè ne m’Bulelèlà aci ne: “Mùshindù ewu ki wàkalwàCi pambidi pàanyi, ne mùshindù ewu ki ungààkaCyúmvwà.” Aci’s ki... Wêwê kùyi mumanyè kutàmba aci to, ambà ànu aci! Tùyaayi! Mukenji ngwà lùkàsàlùkàsà, cikondo cikaadi pabwìpi.

<sup>78</sup> Mpindyewu, ambàayi tûng bu Yeshàayi mwambè ne: “Èè, mpindyewu nêngànji kwindila bwà mmonèbi ntàntà washààlayè ne cyùjà aci, nudi numòna’s. Mmonà mùdì—mùdì...?”

<sup>79</sup> Nwamònu’s, Nzambi wàkamwambila ne: “Bànda kuntwaku ùkamwambilè, ànu mpindyewu!” Nwamònu anyi?

Ki Yèyè kwambila Yona bwà kuyayè. Kaa, ekèlekèle!

<sup>80</sup> Pààkayàye kuntwaku mu mbû amu ne bondoke bwà màyi à mbû abu, ki—ki màzuwà kwimanyikiibwawù dyàkàmwè mu cipeepèlè cicolè cyà mvùla aci, ki bôbò kubàndisha cilàmbà cidì cikwàta lupeepèlè ne pashiishe kucikudimuna ne kucikudimununa, kudikonkabo ciwva kaciyi cyenda bîmpè kuntwaku. Kàdi kabàyikù mwà kwangula mpasu to, bìwva bimwèke ànu bu ne màzuwà àwva ènda ùla tètè ne màyi. Nènku—nènku muntu yònsò ùwva ùsòka nzambi wendè, kadi katanci aka anyi... Yona ùwva mu diikisha dyèndè, ki kudyàmbilayè ne bìwva bîmpè yèyè mufwànyìnèkù kubàkula kalù, nènku ùwva ne cyà kwiikala mupwekè too ne mu citùpà cyà mwinshi mwà màzuwà, ne mudyàdijemù ne makàsà meela muulu, muye mu tulù. Ki ewu ne: “Bìika, Éyi mwena lulèngù nàanyi we, bwà ùsokè Nzambi webè!” Kàdi Yona ùwva mumanyè ciwva kaciyi cyenda bîmpè aci.

Ki mùdì kàbìdì muntu yònsò ewu mumanyè cidì kaciyi cyenda bîmpè leelù ewu! Nwamònu anyi?

<sup>81</sup> Ki yèyè ne: “Byònsò abi ncilèmà cyànyì mèmè. Ngangàtaayi nùnswikè byanza, ne nùngiimànshè mu mbû mwàmwa, nènku dîbà adi lutàtù elu nelùjikè.” Kàdi bôbò bàvwakù bu musumbà wa bantu bàà maalu a bukàlàngà ne kabààkaswà kwenza nànkù to, kadi bàkajandula ne yèyè ùwva mupròfetà ne mumanyè ciwwayè wàmba aci. Yèyè ne: “Mvwà—mvwa ngeela meeji ne nêngànjiku kwangata diikisha dyànyi dyàmbedi, kàdi—kàdi Mukalenge kí mmuswè bwà ngàngatè diikisha edi to. Bìkèngela bwà nye kuntwaku, ndi ne mudimu wa dizenzakù. Mvwà ndyàmbedila ne mvwakù mufwànyìne kwanji kwikisha ndambù kumpàlà kwà kuya, kadi bìkèngela nye. Mu—mkenji ngwà lùkàsàlùkàsà, bìkèngela nyekù.”

<sup>82</sup> Ndi mufwànyìne kudifwànyikijila ne, pàvwà mushipa kampànda mulongolola awu muminè Yona munda mwàwù apu, wàkakùdimuka ne kukùpa màyi mu citùpà cyònsò cyà buloba aci, kukwàtawù njila kuya ku Niniwà ne mwàwù mwònsò. Nzambi ùwva ùya ne mukenji awu kuntwaku mu

mushipa kampànda mulongolola awu. Ki kukwatawu njila kuya ku Ninìwà ne mwàwù mwónsò, bwalu wówò—wówò wùwva ne mùsànjeelà mwambula ne bìwva bìkèngela wùkamufikishè kuntwaku. Yèyè ùwva mwangate màzuwà àvwà kaayi òwò to, kàdi Nzambì ùwva mulongòlwèle mazuwà kampànda.

<sup>83</sup> Pa nàнку, nudi bamanyè's, Nzambì mmukùmbàne kwenza bintu binène bu twètù ànu mwà kuMutèeleja. Nwamònu anyi? Yèyè—Yèyè neàpengè—Yèyè neàpengè njila mwaba wùdi kawùyi njila to. Yèyè *ùdi* Njila awu. Nwamònu anyi? Ne kakùyi mpatà to pàdi Mukenji mwikàle wà lùkàsàlùkàsà, mùdiWu leelù emu, Nzambì ùtu ùlongolola njila kampànda.

<sup>84</sup> Tudi kàbìdi tumòna pàvwà Amòsà. . . Nkààdikù muyiishè pa muntu ewu, Amòsà. Wèwè muswè kubala bwalu abu musangu kampànda, mbulenga bwà dikèma, balà bwalu-bulonda bwà Amòsà, nshapitá wa kumpàla wa Amòsà. Yèyè ncimwè cimfwànyi cyà—cyà madìmwija kumpàla kwà dinyooka kutuutaci mpèkaatù. Mpindyewu, cimenga cìvwàye ukakànyina ne didìmwija ciinè aci, kuntwaku, cìwva mmusumbà wa beena Yudà bàvwà—bàvwà mu mùshindù kampànda bapàmbùke mu njila museba ne balwè mpwilààmàmbò munènè wa beena lwendu bàlwa kubandila. Ne—ne ndi fwànyikijila, bu mùmwà mufile cìfwànyikijilu aci mu dindà adi, ngàakula bwèndè yèyè, ne, pàakafikà mutù wèndè wà dibàlà awu ku lusongo lwà kakùnà ne twìsù twèndè tukesè twà kale atu kukèpetù pàakapwekeshàye mèsù ne kumòna mpèkaatù wa ditungà dinène adi ne bantu, mwedi wèndè mutòokè awu pàakawùlengàye ne minu mùshindù ewu. Ekèlekèle, cintu kaayipu's wè! Kàdi muntu nànsha umwe kì mmumanyè kùdiye mufùmìne to.

<sup>85</sup> Muntu nànsha umwe kì mmumanyè bapròfetà abu to, bàdi bàjuukila ànu mu mwaba kampànda ne bàya mùshindù wùmwèwùmwè awu.

<sup>86</sup> Kàdi wàkabwela mu cimenga aci ne “EMU MMÙDÌ MUKALENGÈ WÀMBA! Nyingàlalaayi, bwà cyanààna nufwàfwa! Bwalu Nzambì neàbutulè ditungà edi. Neà—Neàkupulè mwab'ewu pa buloba. Nudi dyumvwangana ne mulwishì wenù. Nènku nudi nwela meeji ne, nudi—nudi mu ditalala, ne mulwishì wenù awu, kàdi dìbà dyónsò beena Ashù bàdi—bàdi munkaci mwà kudìlongolola bàpeta bukolè kuntu kwàka. Bàbìdi kanwèna mwà kwendela pamwè panwikalà kanuyi bapungè dīyì nànsha. Kwàjiki.” Ki yèyè kwamba. . .

<sup>87</sup> Ne Nzambì mmuswè bwà twètù kuditàpulula. Yèyè mmuswè bwà twètù “kupàtuka mu maalu a pa buloba,” katùyi tuteeta kusòmba eku ne bàà pa buloba eku ne Nzambì to, katùyi tuteeta kudìfwànyikija eku ne bàà pa buloba eku ne Nzambì to. Bìkèngela wikalè ne mwoyi bwà Ewu anyi bwà mukwàbò, bìkèngela wìtabuujè Ewu anyi mukwàbò.

<sup>88</sup> Nènku mpindyewu tudi tusangana ne, Amòsà ewu, ncyà bushùwà ne yéyè wàkadyànjlà kwamba dinyooka pa cisàmbà eci bôbò kabàyi banyingàlále. (Nènku—nènku, ekèlekèle, mùdici me—menemene cikùmbanangana bilenga ne ditùkù dyètù edì's.) Ngeela meeji ne cimenga cinène eci, pàndi nctàngilula apa, cimenga cinène eci kuntwaku, mùvwàci cidifile cyònsò, ne—ne mpetu minène yìvwàbò naayi mu kantu ne kantu, cìvwa citantè. Nènku bàvwa bèèla meeji ne bàvwa menemene ànu mu diswa dyà Mukalenge, bwalu bàvwa bènda bàtanta. Kàdi kusanganabò ne Nzambì kàtu misangu yònsò ànu mfùkyamukèlè wa ditanta to. To, Nzambì . . . Míngà misangu, pàtu ditanta dìbwayika, misangu mivulè èkèleeziyà ùtu ùya kule Nendè.

<sup>89</sup> Nudi bamanyè's, Nzambì wàkaakula bwà Izalèlèlà musangu kampànda, kwamba ne: “Nàkakusangana mu budimi ne mashi pambidi, ne Mèmè kukwowesha màyi ne kukubweja,” bwà kwikalayè mwàn'Èndè Sungasunga. “Kàdi pashìishe pawàkadyundà, ne kulwa nsongààkàji mulenga kwìsù, wèwè kubanga kuditwàla bu ndumbà.” Yéyè ne: “Wèwè—wèwè—wèwè udi udifila kùdi mupici yònsò wa njila.” Nwamònu anyi? “Kàdi paùvwà mupèlè ne mu lukèngelu, paùvwà—paùvwà mu lukèngelu, mpaùvwà uNkwàcila mudimu. Kàdi pàNgààkakubèneshà ne kukupà tètè mu nzùbu tètè pambèlu, ki wèwè kukwàta njila kuNshìya.” Kàdi's mbpjaadikìibbwe ànu mùshindù awu. Kaa, ekèlekèle!

<sup>90</sup> Mpindyewu, tudi tujandula ne mupròfetà ewu wàkatuuta ditungà adi àanu menemene, Amòsà ewu. Yéyè ùvwa ànu mudimi wa ne ditempu dyà nkàsu. Kàdi tudi tujandula ne pààkenzàye nàнку, mutuutè ne mubàmbìle cìvwàci mwà kwikala, ne mubàmbìle ne bôbò kabàyi badìlongòlòle kumpàla kwà Nzambì to ànu mwena lukunà uvwàbò baswikàkàne nendè awu ki yéyè mene uvwà mwà kubàbutula.

<sup>91</sup> Mpindyewu tudi tujandula ne Àmèrikè wetù mudibàndishi ewu kàakupàndukakù ku cijji cicolè cyà Nzambì nànsha. Ànu múmvwà mwakùle ditùkù kampànda kacya ànu mfika mwab'ewu, ndi mutwìshìibwe ne pàvwa mmwab'ewu, bwà cintu cyònsò ciikàle ku ndekeelu. Nudi bamanyè's, ncyèna—ncyèna mwà kumòna cintu nànsha cìmwè cyà kwibakilapù to. Kwèna mwà kwibakila pa cìdìdì to, bwàci bùkaadi butùùke. Kwèna—kwèna mwà kwibakila pa nsòmbelu wa pànu ewu to, bwalu mmutàmbe kunyanguka. Kakwènakù—kakwènakù—kakwènakù cintu nànsha cìmwè cyùdiku mwà kwibakilakù to. Ne kwènakù mwà kutèkela ditèkemena mu cintu nànsha cìmwè to.

“Kàdi twàmbè bishi bwà èkèleeziyà?”

<sup>92</sup> Èè, kwèna ne cyùdì mwà kwenza ne èkèleeziyà to, ùkaadi wa maalu à kwìsùkwìsù ne mufwè, kakùcyèna cìdì cishààle nànsha cìmwè to. Bàkaadi bamanè kupàanyisha bwanààbutè

bwàbò ku dilòngò dyà musàbù, kàdi mbindìle ànu cilumbulwidi. Nyumà Mwimpè mmukòsòlòle ditungà edi, uleeja bimanyinu Byèndè ne maalu à kukèma, kàdi bàdi bàbènga ngàsà Wèndè ku maditambishi. Yèyè ùdi ùDishindika ne ùjaadika, ku dishindika Dyèndè dinène ne, Yèyè ùdi Dìyi dyà Nzambi dimwèneshiibwe mu ditùkù edi. Kàdi bôbò bàcidi ànu baDibènga. Nwamònu anyi? Kakwèna cidi cishààle mpindyewu to. Kwèna ànu mwà kutungunuka ne kwenzela Nzambi nanku misangu yònsò to. Nwamònu anyi?

<sup>93</sup> Èyo, tudi tusangana ne, dyàmbedi, Yèyè ùtu ùtuma bapròfetà Bèndè ne didimwija. Kàtu ùshintulula njila Wèndè, mùshindù Wèndè wà dyenza maalu to.

<sup>94</sup> Yèyè kàtu misangu yònsò ànu ùtuuta pàdiYè ùdimwija to. Ndi muswè nùtabaleelè dìyi dyamba edi. Nzambi ùtu ùfila didimwija kàdi Kàtu misangu yònsò ànu ùtuuta díbà dimwèdimwè didiYè ùdimwija adi to. Nukaatukù bamòne nànkù anyi? Ne pashiishe pàdiYe kayi ùtuuta pàdiYe ùtuma didimwija, díbà adi bàdi bàseka mupròfetà, “Kùvwa muCipetè to. Ùvwa mwambè dishima. Kùvwa—kùvwa mubingè to.”

<sup>95</sup> Aci, cintu cìmwècìmwè aci's bàvwa bafwànyine kwikala bacyàmbè—bacyàmbè Yeshàayi. Nudi nwela meeji ne muntu awu wàkadyàmbidila cinyi pààkayàye kuntwaku bwà kwambila mfumù awu cipròfetà cyà ne ùvwa “ne cyà kufwà,” pashiishe kwalukila è kwamba ne: “To, neikalè ne mwoyi”?

<sup>96</sup> Kàdi bìshi bwà Yona ùpicila mu mìsèèsù amu, wàmba ne: “Kaa, cimenga eci necibutudiibwe munda mwà matùkù bùngi kampànda, matùkù makùmi ànaayi,” kàdi pashiishe Nzambi kàyi mucyènzè?

<sup>97</sup> Nwamònu's, bikèngela utangilè bìmpè, Nzambi kàtu misangu yònsò ànu ùtuuta pàdiYè ùdimwija apu to. Kàdi Yèyè...Kùdi cintu cìmwèpelè, pashiishe mupròfetà ùdi ùsekiibwa. Kàdi yèyè mwikàle mupròfetà mùshindika ne Dìyi dyà Mukalenge, nwamònu's, ne bimanyinu byà Nzambi, mùshindika, bu mwàkambà Nzambi ne mupròfetà ùvwa mwà kushindikiiibwa (cìvwà bantu aba aci's), nwamònu's, Dìyi dyèndè adi kì ndyèndè yèyè to, kàdi ndyà Nzambi, ne nedyènzèkè. Bikèngela dyènzèkè pìikalàbi ne n'Dìyi dyà Nzambi. Kùdi cintu ànu cìmwèpelè cìdiku mwà kucìmanyika, nkanyinganyinga kàà cìmpicìmpi.

<sup>98</sup> Mònaayi, Amòsà, wà—wàkashààla ne mwoyi too ne ku dimònà dyà cipròfetà cyèndè aci. Kàdi pààkaakulà Amòsà bwà cimenga aci, mùvwàbi mwà kwenzeka, mùvwà Nzambi mwà kwenza ne beena Suuliyà bàbwelèmu ne bàbàngàtè ku bukòokeshi, ne bikwàbò byà mùshindù awu, ne mùvwà dinyanguka dyàbò sungasunga mwà kubàbùtula, mòna's, ngeela meeji ne, cyòci mu cyòci, mpindyewu, ndi ntàngila pa Mufundu apa, ne pìikalàbi ne ndi mucibalè bìmpè, bidi biipacila ku

bidimu makùmi àtaanu paanyimà pàà Amòsà mumanè kwamba cipròfeta aci. Nènku, mpindyewu, nudi nwela meeji bishi? Lukòngò lujimà lwàkapita kumpàla kwà cipròfeta cyà Amòsà aci kwenzekaci. Kàdi bu wèwè mwà kubala lwà apa, s'cidi cikwambila, ne cyòci cyàkenzeka ànu menemene ku díyi ne ku díyi cyàkambaye aci. Nwamònu anyi?

<sup>99</sup> Yone wàkamòna Mukàndà wà Bwàkabuulwibwà. Kabyàkenzeka mu ditùkù dyèndè to. Kàdi ki twètù aba tubimòna byènzeka ànu menemene. Nwamònu anyi?

<sup>100</sup> Danyèlè wàkamba cipròfeta cyà ditùkù adi, cyà ditùkù dyèndè ne byònsò too ne ku ndekeelu. Kààkashààla ne mwoyi too ne ku dicimòna to. Wàkamba ne: “Kwàta njila ndàaku, Danyèlè. Bwikilà mukàndà awu—mukàndà awu, ne—kànga mukàndà awu. Nènku wèwè neùlaalè mu kèèbè katupà, kàdi ku ditùkù adi newimanè.” Nwamònu anyi?

<sup>101</sup> Mpindyewu, nudi numòna's, kùdi... kanùtu misangu yònsò ànu... Nzambì... ùtuuta ànu pàdiYe wamba cipròfeta apu to. Cipròfeta cyà Amòsà, mungàmbi, mpaanyimà pàà bidimu makùmi àtaanu, pààkenzekaci. Kàdi cyàkenzeka cyà bushùwà!

<sup>102</sup> Nènku díbà adi mupròfeta ùdi—ùdi... wa Bible... Mupròfeta wa cyà bushùwà, ne mushùwashùwàlè mmuntu wa pabwèndè. Kí “ngwa pabwèndè,” mwikàle mushùlàngàne ne muntu mukwàbò kanà yònsò ewu to, kàdi ùdi ne mudimu wa pabwàwù. Nwamònu anyi? Nènku, bu mùdiye ne mudimu mumutùma nàawu wà pabwàwù, bikèngela ikalè wa pabwèndè (mushùlàngànekù ndambù ne bakwàbò) bwà kwenzayè cyòci aci.

Bidi ànu bu mùtù Nzambi mufwànyikije *bapròfeta* Bèndè ne “mukanku” amu's.

<sup>103</sup> Mpindyewu, mukankù nnyuunyi wa pabwèndè. Ùdi ànu nyuunyi wetù ewu's, kàdi nnyuunyi wa pabwèndè. Ne ùtu mwà kubùuka kuya muulu kutàmba nyuunyi mikwàbò. Ùdi mwà kumòna kule kutàmba nyuunyi mikwàbò yònsò. Nènku, mpindyewu, bwà kutàmbayè kuya muulu, bikèngela ikalè mwibàkiiibwe mu mùshindù wà ùtamba kubànda muulu. Nènku mbifwànyine kumukwàcisha ku cinyi bwà kubànda muulu amu pìikalàye kàyi mwà kumòna civwàye wènzà paanyimà pàà yèyè mumanè kufika muulu amu? Nwamònu anyi? Pa nànkù ùdi ne cyà kwikala nyuunyi mwibàkiiibwe mu mùshindù wà pabwàwù. Nwamònu anyi? Ùdi bu wa mu—mu díkù dya tubemba, yèyè “mmusùsuludi wa ne mwínù.” Ne ùtu ùdya... yàbùngì yà ku yòyi mbidyàbibolè. Kùdi mìshindù mishùlèshùlàngàne yà mikankù mitwè ku makùmi ànaayi.

<sup>104</sup> Kàdi, nudi numòna's, mu èkèleeziyà mùdi mpaasàtà, ne mpaasàtà awu mmuntu wa pabwèndè. Yèyè mmwibaka mu mùshindù wà ne ùdi mwà—ùdi mwà kutwàla makòkyanganyi a bantu. Yèyè—yèyè—yèyè mmwambudi wa majitu, yèyè nngombe

wa cikòkedi mu kasumbu. Yèyè—yèyè mmuntu udi mwà kusòmba panshi pàdì. . . muntu ne cilumbù kampàndà ne mukwèndè, ne yèyè ùsòmba ne mèkù ònsò àbìdì awu (kàyi ùtwa nì nku cyà edi anyi ku cyà edi to) ne ùcilumbulwisha ne ùcyàluja mu kalolo. Nwamònu anyi? Yèyè—yèyè mmpaasàtà, mmumanyè mwà kutàbaleela maalu.

<sup>105</sup> Mutangadiki mmuntu wa pabwèndè. Mmuntu udi ulàkuka kapyà bu dibùlù dyà kapyà. Ùdi ùbwela lubilu mu cimenga ne ùyiisha mukenji wèndè, pashìshe ùpàtukamù ùditwa mu mwaba mukwabo. Nwamònu's, yèyè mmuntu wa pabwèndè.

<sup>106</sup> Mulongeshi mmuntu wa pabwèndè. Ùdi ùsòmba mu dilaabiibwa dyà Nyumà ne mmukùmbàne kwangata Méyì ne kuàtwàngaja ku Nyumà Mwímpè, bìdì ne, mpaasàtà anyi mutangadiki, yònsò wa kùdìbo, kàyi mwà kufwànyikijibwa nendè to.

<sup>107</sup> Nènku dîbà adi, tudi tusangana ne, mùpostòlò mmuntu wa pabwèndè. Yèyè ùdi—yèyè ùdi “mutèèki wa bulongàme.” Yèyè mmuntu udi mutùmìibwe kùdì Nzambi bwà kutèeka bintu mu bulongàme.

<sup>108</sup> Mupròfeta mmuntu wa pabwèndè. Mupròfeta mmuntu mwena kùdì Dìyì dyà Mukalenge dilwa, bwalu mupròfeta mmwenzà mu mùshindù wà ne (mwoyi) kandòndò kèndè kàà mwoyi ne kondò kèndè kàà mwoyi mbitàmbe kwikala pamwè mu mùshindù wà ne kabyèna bikèngela bwà kulààlayè tulù bwà kulòotayè cilòòtà to, yèyè ùdi ùcimòna pàdiye mutàbàle ne mèsù matonona apu. Nwamònu anyi? Mpindyewu, aci ncintu cidì cikèngela bwà Nzambi kwenzaYè. Nwamònu's, yèyè ùdi ùmòna cidì cyènzekà.

<sup>109</sup> Mupròfeta ùdi ùdyànjila kumòna kule, nwamònu's, bintu bicilwalwà. Ùdi ùmòna lupànza lwà ciiji cicolè cyà Nzambi, lùle tètè, kumpàlà kwà kuulalù. Ùdi mwà kwamba ne: “EMU MMÙDÌ MUKALENGE WÀMBA! Nzambi neàbutulè cimenga eci nwènù kanùyì banyingàlale.” Bwà cinyi? Yèyè's mmukankù. Ùyaaya kule kwàka. Nwamònu anyi? Ne ùkùpa mèsù kule kwàka ne ùmòna lupànza lwà ciiji cicolè lupòngolola. Ki cidì mupròfeta ùtàngila. Kèna ùtàngila cidì munkaci mwà kwenzeka apa to, yèyè ùdi ùtangila dyàmwàmwa! Ùdi wàmba ne: “Cilwalwa!” Ùdi mwà kuya mu butumbuke mu mùshindù wà ne ùdi mwà kumòna dilèji adi. Yèyè kwamba ne: “Buloba nebwikalè mîdimà—mîdimà ne mîdimà yà mupimbu.” Yèyè's mmubànde muulu bikùmbàne, dîbà dîdì munkaci mwà kutwà nsèsè mpindyewu, kàdi ùdi ùmona mùlwalwà dilèji adi, nènku ùdi—ùdi—ùdi wàmba cidìye ùtàngila aci's. Kî ncyanjì kwikala apa to, kàdi neciikalèpu bulelèlè! Ncyà bushùwà. Neciikalèpu, mîdimà yà mupimbu pa cisàmbà. Yèyè mmumanyè ne cilwàlwa, mu ntàntà wa bidimu, kàdi yèyè ùcimòna.

<sup>110</sup> Amòsà, mupròfetà mulaaba maanyì wa Nzambì awu, wàkamòna mí—mídimà ne cilumbulwidi. Wàkamòna Suuliyà ùpweka ne màkalù àbò à mvità ne ùkòmba mwònsò amu, ùshipa bantu abu ùbàbùtula. Wàkacimòna cìlwa ne dinyooka dyà Nzambì pa bòbò, mpindyewu, bidimu makùmi àtaanu kumpàlà kwà kwenzekaci. Kàdi, nudi numòna's, bu mùvwàye mupròfetà, wàkabàndishiibwa mu Nyumà ne kucimwena kule menemene. Nwamònu anyì? Wàkamòna lupànzà alu, lùle, kumpàla kwà kuulalù.

<sup>111</sup> Byenzè bu Abraham. Nzambì wàkambila Abraham ne: “Dimiinu dyèbè nedilwe mu ditungà edi ne nedisombelemu bidimu nkàmà yìnaayi, ne pashìishe Nèmbàpàtùlè ne cianza cyà bukolè, bwalu bubì bwà beena Amòlà kí mbwanjì kuula to.” Nwamònu anyì? Nzambì ùvwa mumanyè ne lupànzà alu lùvwa mwà kuula. Ùvwa wàkula ne mupròfetà Wendè, Kumwambila Yè mpindyewu ne: “Udi umòna lupànzà lwà beena Amòlà lwàlwa,” nwamònu's, “kàdi bubì bwàbò kí mbwanjì kuula to, Abraham. Kwàmbi kantu nànsha kàmwè pa bwalu abu mpindyewu to, shààla mupùwe, kàdi necyùlè. Nènku pùula lupànzà lwàbò, ne bidimu nkàmà yìnaayi abi, Nèmbàpàtùlè ànu mùdi mpasu yà lokùsètà amu kumpàlà kwèbè, ne Nenshindamijè dimiinu dyèbè adi mu buloba ebu nùnkù.” Amen! Ki mupròfetà wa Mukalenge nyèyè awu.

<sup>112</sup> Mpindyewu, pàdiye ùlonda cikèènà-kumòna cyèndè, nànsha cyòci ciikàle cijì cikolè anyì ciikàlè dyondopa, cidi mwà kunènga, kàdi cidi ne cyà kwenzeka yèyè ùcyàmba mu Dìnà dyà Mukalenge. Nwamònu anyì? Ncifwànyine kwikala dibènèsha dìdiye wamba bwà bwalu bwèbè. Mmufwànyine kukwambila cintu kampànda, kàdi wèwè kùyì mwà kucimònaku tò nànsha kakesè. Wèwè udi wamba ne: “Bidi mwà kwenzeka bìshi? Mòna's, cidi. . . Mèmè—mèmè—mèmè. . . Yèyè kungambila ne: ‘EMU MMÛDÌ MUKALENGE WÀMBA, “*Cikampànda* necyènzekè, ne *cikansanga* cìvwa ne cyà kwenzeka,” kàdi kí ncyènzèke to. Muntu awu mmwmbè byà mafi!” Mpindyewu neùlumbulwishiibwè bwà dibènga kuCìitabuujà, kàdi necyènzekè nànsha bìshi! Nwamònu anyì? Cidi ne cyà kwenzeka!

<sup>113</sup> “Nànsha cyòci cinènge,” mwàmbambà Bible, “kàdi necyàkulè mu muvù wàci.” Necyènzekè.

<sup>114</sup> Mupròfetà ùdi ànu wìndila ne ùmòna cintu kampànda. Ùdi wàkula bwà cidìye munkaci mwà kutàngila. Yèyè kèna wèla meeji bwà cidi apa eci ne cyùdì mpindyewu to, ùdi ùtàngila ciikalàci. Ne pàdiye wamba cyòci aci apu, cyòci ciikàle mu Dìyì dyà Mukalenge, cikaadi cimanè kwambiibwa ne kakwènaku pa buloba apa cidi mwà kucimanyika to (nudi numòna's, ncyà bushùwà,) anu Nzambì Yèyè nkààyèndè.

115 Mònaayi, mpindyewu tudi tusangana ne pàdi...Yèyè—yèyè udi ùlonda cikèèna—kumònà cyèndè, mupròfètà awu. Mpindyewu, misangu mikwàbò ùdi wàmba bintu bìmpè, ùdi wàkula bwà dyondopiibwa dyèbè. Èyo, udi mufwànyine kwela meeji ne: “Kabyèna ànu mwà kwenzeka to, ncyèna muumvwè dishiilangana nànsha dikesè to.” Dìbà adi aci cìdi cyènza cinyi? Aci’s cìdi ànu cikutwàdila manyooka à Nzambì. Ncyà bushùwà. Nwamònu anyi? Yesù mmulayè bwà kukusungila bu wèwè mwà kuCìitabuuja; wèwè kùyi muCìtábùùje to, kacyà—kacyàkukwenzekela to. Bìkèngela ùCìtábè, bìkèngela ùCìtábùùje. Nwamònu anyi? Nènku bìkèngela ùmanyè kùdiCi cìfùmina, cìdi cìkupèèsha diitabuuja dyèbè mu Nzambì, anyi mu mupròfètà webè. Nwamònu anyi? Bìkèngela ùCìtábùùje.

116 Nènku mpindyewu tudi tusangana kaaba aka ne, bapròfètà bàvwà bààkulà aba, bàvwa—bàvwa bààkula ne bìvwàbò bàmba bìvwa byènzeka. Nènku cìiji cìkolè cyà Nzambì cyòci cìicìkijìibwè pa bantu, kùdi cintu ànu cimwèpelè. . . Mupròfètà awu yèyè mwambè ne cintu kampànda cìvwa ne cyà kwenzeka, kùdi cintu ànu cimwèpelè cyàkàndikà cyaanza cyà Nzambì, nkanyinganyinga. Nkanyinganyinga kumpàlà kwà Nzambì, ki kàdi kàkàndikà cìiji Cyèndè cìkolè aci. Mpindyewu, kanwindidi aci to, cyènzàayi dyàkàmwè! Pàdi Nzambì wàmba cintu, wèwè cyènzè ànu dìbà adi mene.

117 Hezèkiyà, mmwenzè ànu ùmanyà...Yèyè ùvwa muntu mwìmpè, kàdi Nzambì wàkamba ne: “Dìbà dyèbè dyàkùmbanyi, Hezèkiyà, nènku Ndi—Ndi ne cyà kukwangata. Ndi—Ndi muswè kukwangata, Ndi ne cyà kukuumusha. Tèèka nzùbu webè yònsò mu bulongàme.”

118 Ki yèyè—yèyè—yèyè kwamba ne: “Nebìnkèngèlè bidimu dikùmi ne bitaanu bwà kucyènza, Mukalenge.” Nwamònu anyi? “Mpindyewu, ng’Wèwè... Ndi—ndi—ndi mumanyè ne nènye, kàdi nebìnkèngèlè bidimu dikùmi ne bitaanu bwà kutèeka nzùbu wanyì mu bulongàme. Ncyèna mwà kucyènza mpindyewu mene to. Ncyèna—ncyèna ne dìbà dyà kucyènza to. Ncyèna—ncyèna—ncyèna ànu mwà kukòòkesha kucyènza to. Mukalenge, ndekèlèku nshààle ne mwoyi bidimu bikwàbò dikùmi ne bitaanu bwà ngààkòòkesha kwenza ciine cintu eci. Ncyèna mwà kutèeka nzùbu wanyì. . .”

Nwamònu’s, mudimu mumutùma naawù kùdi Nzambì wùvwa ne: “Tèèka nzùbu webè mu bulongàme!”

119 Ki Hezèkiyà kwambayè ne: “Ncyàkukòòkesha kucyènza mu eci cidimu to, nebingangàtè dìbà. Nèngààlujè *cìkampànda*, ne ndongololè *cìkansanga* ne kucìtwàdila muntu kampànda ewu, nebìnkèngèlè bidimu dikùmi ne bitaanu bwà kucyènza. Anjì ndamèku bwà ncyènzè. Anjì...anjì...mpèèshèku ndambù wa cìkondo bwà ncyènzè.” Nwamònu anyi?



<sup>120</sup> Pashìishe Nzambì kwamba ne: “Nê—Nê—Nê—Nêngiikalè ne lutuùlù.” Kàdi bivwa bikèngela áfwe nànsha bibànde nànsha bipwekè, nudi numòna’s.

<sup>121</sup> Ne díbà adi kàbìdì, kwangatayè díbà dyàbúngì, yèyè kutwà cìmpìngà mu ciinè cikondo aci. Nwamònu anyi? Kàdi’s bivwakù bímpè—bivwakù bímpè bu yèyè muye kàyi mutèèke bwinè bulongàme abu. Ncyà bushùwà’s. Kàdi Wàkamupèèsha bidimu dikùmi ne bitaanu bwa kutèeka nzùbu wendè mu bulongàme. Bwalu, ne lùkàsà lwònsò, wàkenza cinyi? Yèyè ne: “Mukalenge, ndi ne lujòòkò. Bidi binkèngela bidimu dikùmi ne bitaanu bwa kwenza cyòè eci. Udi muntùmine díyi bwa kutèeka nzùbu wanyi mu bulongàme. Ncyèna mwà kucyenza mu bidimu dikùmi ne bitaanu bwalu ndi ne dibànzà mwab’ewu, ne ndi ne *cikampànda* mwab’ewu, ne ndi ne *cikansanga* mwab’ewu cyà dyenza.”

<sup>122</sup> Mpindyewu, yèyè ùvwa muntu wa difwànà dyà Nzambì, kàdi bivwa bikèngela bwa Díyi dyà Nzambì dyènzekè nànsha bishi. NeDyènzekè nànsha bishi, kàdi Yèyè wàkaDijànguluja bwa katanci kakesè nàka, nwamònu’s, kuDyùmusha kùdiye. Pashìishe kwenzayè mpèkaatù kampànda munda mwà ciinè cikondo aci. Yèyè ne: “Ncyàkwenza bwa kulwaci pa yèyè to, kàdi Nèncikùmbàjilé pa bânà bèndè paanyimà pèndè.” Nudi bamanyè bwalu abu.

<sup>123</sup> Mpindyewu, tudi tusangana ne kanyinganyinga kàa cìmpìcìmpì kàtu misangu mikwàbò kàkànda ciiji cìkolè bwa cipòòlò kampànda.

<sup>124</sup> Mpindyewu, tudi tusangana ne Ninìwà. . . Nzambì kwamba ne: “Pwekà kuntu kwàka wèlè mbilà mu cimenga aci mpindyewu, ubàmbilè ne: ‘Pìikalà. . . munda mwà matùkù makùmi ànaayi cintu eci necìbutuke.’” Kàdi, ekelekèle, ki kunyingalalabò’s wè! Mbenzè ànu bà mòna mupròfètà awu ùlwa mu mùsèsù, wàmba ne: “EMU MMÙDÌ MUKALENGE WÀMBA, ‘Mwaba ewu newùbutukè munda mwà matùkù makùmi ànaayi! Mwaba ewu newùbutukè!’” Kùdì. . .

<sup>125</sup> Nànsha mfùmù mwinè kutùmàyè díyi bwa di—di—dijila dyà byàkudyà mu ditùnga amu, madilu ne: “Vwàlaayi mifuku, nudyèlè butù! Kabiyi ànu mu mutù ne pambidi ne pa mibidi yènù to, kàdi ne pa ngombe yènù, pa nyama yènù ya mu mpàta, nùyèlè butù ne nùyìvwàdikè mifuku.” Kanyinganyinga kaayìpu’s wè!

<sup>126</sup> Mpindyewu, patùdì tusangana mwaba awu, tudi tumòna ne, mupròfètà yèyè kàyi mutàngìlè lùkàsà menemene to, nwamònu’s, mubùmbàkàje meeji pàmwè ne muyè kùdì Nzambì to, nenùsanganè cintu kampànda ànu mwaba awu, nwènù kanùyì batàngìlè bímpè. . .

<sup>127</sup> Mpindyewu tàngìlàayi Yeshàayi, wàkamba yèyè ànu cipròfètà cyèndè cyanààna, kwalukilayè e kubwela mu kaamutàndà kèndè kàa mu cipèèlà aku. Nènku, pààkenzàye nànkù, Mukalenge kàakandamuna mfùmù uvwa usambila awu

to. Yèyè ùtu ne mùshindù wà dyenza maalù. Kùvwa mupròfetà mu ditunga amu. Diyì dyà Mukalenge ditu dilwa kùdi mupròfetà Wendè. KupàtukaYè kwàka e kwamba ne: “Yeshààyi, alùkila ukamwambilè ne Ngátèèleji disambila dyèndè. Nngùmùvù ne bidì...ne ùdi wèla meeji ne nebimukèngèlè bidimu dikùmi ne bitaanu bwà kwenzayè cyôci eci. Ngàmònu binsònjì byèndè bwalu ùvwa ùjinga bikolè bwà kwenza mudimu awu. Nebimukèngèlè bidimu dikùmi ne bitaanu, mùdiyè mwambè, bwà kucyènzayè. Ndàaku ukamwambilè ne Nèmmupèeshèbi, díbà adi.” Nwamònu anyì?

128 Bwà cinyì? Wàkatùma ne mudimu—Wàkatùma Yeshààyi ne mudimu bwà kuyayè kamwambila ne: “EMU MMÜDÌ MUKALENGÈ WÀMBA!” Díbà adi kwòkò dishintuluka kampànda mu cyôci aci, anyì dinènga...Necyènzekè nànsha bishi; yèyè—yèyè wàkafwà ànu kufwa. Kàdi kwambayè... Kwòkò cintu kampànda mu cyôci aci, díbà adi mMwenzèjùbwe bwà kwalukila kùdi muntu uvwaYè mutùmìne EMU MMÜDÌ MUKALENGÈ WÀMBA awu. KwambilaYè Yeshààyi ne: “Alùkila kwàka ukamwambilè.”

129 Mpindyewu, Yona wàkangata lwidì lwà mùshindù mushiilàngane, kubàndayè kuulu kwà kakùnà e kwambayè ne: “Èè, s’bivwakù bimpè bu ne ncivwa nànsha mulediibwe’s.” Nènku, kaa, mùshindù mwinè wakatungunukàye’s wè! Ki Nzambì kutólwèshaYè kààcilòwalowa bwà kumwenzelakù ditalajà bwà wàmòna mwà kupetakù cyashima kuntwaku. Kàdi yèyè kwamba ne: “Mpindyewu, mwaba ewu, mèmè muyè kuntu kwàka, s’nebàmbè ne ndi mupròfetà wa mashimi’s.”

130 Ki Nzambì kwakulaYè nendè, kwambaYè ne: “Tàngilà cimenga cidì kwinshi kwàka cyàcya! Kùtàngilè, Yona, cimenga cijimà cidì munkacì mwà kunyingalala bavwàle mifuku badyèlè butù.”

131 Ne pashiishe kumwambilaYè bwà kaacilòwolowo aku ne cìshì cyàkakùùpulà aci. Dìngà ditùkù, bu Mukalenge mwà kwanyisha, ndi muswe kulwa ku Tabernacle eku bwà kwenza dilondangana dyà malongesha ànu pa bwalu bwà Yona. Kaa, kùdi minène búngì cyanààna...lupeepèle lwà ku esètè lùtuuta, ne byònsò abi. Kaa, ekèlekèle! Kùdi bintu búngì cyanààna muntwamu, bidì ànu...bidì bitùpishangana ne disànka. Bimpòkòtò abi muntwamu, bimfwànyì byònsomù, bikùmbànàngàne. Cidì mene cìtwàlamù Yesù Kilistò, ne bikwàbò byònsò. Mu bushùwà bwà bwalu, mushoonyi wònsò mu Bible wùdi wùtwàla Yesù Kilistò. Èyowà’s, mukalenge. Ki dileesòna dyètù dyà dyàlumingu adi’s, pa nàнку netusanganè cyôci aci, bu Mukalenge mwà kwanyisha.

132 Nènku mònaayi, kùdi bintu byùdi... Wèwè ne meeji matòòke ne wambila Nzambì... Mpindyewu, bikèngela ùtangilè bimpè.

133 Mpindyewu ndi muswè kunùleejakù mukwabo Yona pa cibumba cyà ku cyambilu apa dilòòlò edi.

134 Dilòòlò kampànda kwàkalwa bantu kampànda mwab'ewu. Inábànzà awu udi mwà kwikala (bàmwè bàà ku bàà kwàbò) mwab'ewu dilòòlò edi, bwà ncìikadi ngálwa kutèèla dìnà adi to, pàmwápa nudi bafwànyine kumanya ne nganyì mwinè awu. Kàdi bàtu bàlwa mwab'ewu, musùmbà mulenga wà bantu bàà ku Kentucky kwàka, ne bàtu—bàtu bàlwa mwab'ewu kùkaadi bidimu. Kàdi bantu abu, biikàle bantu bàà maalú mîmpè, balundà bàànyì bîmpè. Ekèlekèle, bôbò bàvwà—bàvwà balundà bàànyì bàà bushùwà, kàdi bôbò... Anu bàmwè bàà ku bantu bàtu pàvwà ditàbuluja munkaci mwà kwenzeka bàvwà mwà kulwa mu èkèleeziyà; pàvwà ditàbuluja dijika, ne bujitu bùvwà bwà dikòka, kabàyi baswè kukòka to. Nènku bàna bônso bàvwà mwab'ewu mu cilongelu cyà bàna, bàvwà ne... patùvwà ne tulaasà twètù ne bikwàbò apu.

135 Nènku dîngà ditùkù mèmè kwalukila kumbèlu, kùkaadi bidimu bu binaayi nàнку, anyì bitaanu, cintu bu nàнку awu. Nènku nsongààkàjì wa citende ewu, (uvwa ne bidimu bitwè ku mwandamukùlù pàvwàye mu cilongelu cyà bàna aci), ùkaavwa musèdìbwe ne mulelè bàna bàbidì. Nènku ùvwa mulàadika mu lùpitaadi mwàmwa, ùpunga ne lufù. Ùvwa ne difù dyà ngondo mitwè ku yìnaayi, anyì yìtaanu; ne mwànà awu ùvwa mufwè, ne kabàyi mwà kumupanda to bwalu ùvwa ne disaamà dyà divulgana dyà mènnyì mu mashi. Nènku kabàvwà mwà kupanda to, pa nàнку kukèngelabi bwà kulekela maamù awu àfwe yèyè pèndè. Kabàvwà mwà kupanda to, nènku, nwamònu's, mwànà awu ùvwa mufwànyine kumushipa mùshindù awu, nàнку bàvwà ne... ùvwa ànu ùpunga ne lufù, kwàjiki, kakùvwakù mpungà bwèndè yèyè to.

136 Mèmè kuya bwà kamumòna, ùvwa mutùme bantu bwà kulwa kunkèba. Ki mèmè kubwela mu lùpitaadi amu, nènku ki yèyè awu ùpuuyakeena ku mbòmbonè. Mèmè kujuula kaacilàmbà kakesè aku, kwakula nendè ndambù, ne mèmè kwamba ne: "Udi mumvùlùke anyi?"

Yèyè ne: "Bushùwà's, Mwanèètù Bill, s'ndi mukuvùlùke."

137 Mèmè ne: "Mbishi mùdì... Udi umvwa mùshindù wùdì usaama anyi?"

Yèyè ne: "Ndi nguumvwa." Yèyè ne: "S'ki bwà cinyi ndi mukubiidìshe."

Mèmè ne: "Èè, mòna's, bishi wèwè ne Mukalenge?"

Yèyè ne: "Mwanèètù Bill, ndi—ndi ne... Ncyèna—ncyèna mudìlongòlòle bwà kuya to."

138 Èè, mwab'awu twètù kutwà binù ne kusambila, nènku mamwèndè ne bàyèndè, bààbùngì bààbò mu cibambalu amu, ki mamwèndè ne bàyèndè kubangabò kudila myadi. Ki—

ki díbà adi mêmè—mêmè kumukonka, ne kuditéekayè mu bulongàmè ne Nzambi (kufutayè micipù yèndè ne kwalukilayè kwenzela Nzambi mulayi; ne bu yêyè mwà kufwidiibwa luse; mùvwàye muMunangè's; kàdi ùnyingalala bwà mpèkaatù yèndè, mùshindù wà nsòmbelu uvwayè nendè), ne kutùngunukayè ne kanyinganyinga kèndè ne kudila mwadi. Nènku paanyimà pàà katanci mêmè kujuuka ne kupàtuka mu nzùbu amu.

<sup>139</sup> Ki pàà—pààkacyàbu mu dindà kumbiikilabò, bwà mêmè kwalukila kuntwaku. Nènku, mêmè kusangana ne, bàvwa balwè mu dindà amu bwà diteeta bwà kumòna mùvwà di—disaamà dyà mênýi mu mashi adi ditante, kàdi kusanganabò ne yêyè kàcívwa nànsha ne katobà kàadi to. Divwa diyè dyònsò, kantu ne kantu kònsò kàà lulengu lwà mênýi mu mashi alu kàvwa kamuumùke. Bangàngàbukà bàvwa basalùke mu mùshindù wà ne bàákamba ne: “Èkèlekèle! Mòna's, eci, bìvwa bikèngela twètù. . . Ncintu cyà pabwàci menemene.” Yêyè ne: “Netù—netùmulongolòlè,” ki yêyè ne, “piikalàbi bìcidi anu mùshindù awu mu dindà. . .” Bòbò ne: “Netùtungunukè ne kumutwà pènìsiliinà,” anyi nì ncinyi cívwbò bàmutwà aci, bwà kupwekesha bukòlè bwà twìshi. Bòbò ne: “Netùmupandè bwà—bwà kupàtula mwànà mufwè awu kumpàlà kwà yêyè kakeba cingà cintu.” Bòbò ne: “Piikalàye muumvwè bìmpè, díbà adi. . .”

<sup>140</sup> Èè, kumuteetabò cyàkàbìdi misangu bu yibìdi anyi yisàtu diinè ditùkù adi. Ki dilòòlò adi, ku shòò, kumuteetabò, mutupù, byònsò bìvwa bìmpè ànu menemene. Ki bòbò kumulongolòla. Kumupàtulabò mu ntentà wa mbòmbonè mùvwàye amu. Byònsò bìvwa bìmpè. Bàvwa ne cyà kumupanda mu dindà divwà dilondà adi, bwà kupàtulabò mwànà.

<sup>141</sup> Èè, mêmè kuya kuntwaku. Nènku ànu bwalu eci cívwa cyenzèke. . . Mpindyewu, ncìvwakù mucimanyè to, ncìvwakù mumanyè to. Mukalenge kàvwa mungambilekù cintu nànsha cimwè pa bwalu abu to. Nudi mwà kwebejaayi bantu, nwènù baswè. Ki bòbò. . . yêyè. . . Yêyè kàakambakù ne cívwa cifwànyine kwenzeka to. Kàdi, kaa, ekèlekèle, pa kumòna cintu bu—bu nànkù's! Bàyendè, mwikàle ngènzàmpèkàatù, kulwayè mwab'awu è kwambayè ne: “Mwanèètù Branham, ndi—ndi muswè kufila mwoyi wànyì kùdi Mukalenge Yesù.”

<sup>142</sup> Ki mêmè ne: “Èyo, twàku ànu binù mwab'ewu ùshaalè mukwàte cyanza cyà mukàjèèbè, nènku díbà adi nwèndelè mu nsòmbelu mululàme ewu cyàpàmwè.”

<sup>143</sup> Maamù awu kwalukilayè, kwambayè ne: “Mwanèètù Branham, udi mumanyè's, s'ki mêmè ewu ne bânà bàànyì,” yêyè ne, “tutu batànkàkàne be, twàbwela twàpàtuka, twàbwela twàpàtuka mu Tabernacle emu, ne bikwàbò. Basòmbè tukutèèleja mùdi uyiisha, nènku tudì mwa kubànda ku cyoshelu ne kwalukilè.” Yêyè ne: “Mêmè pàànyì, ndi mutwè cimpingà, Mwanèètù Branham.” Yêyè ne: “Ndi muswè kwalukila kùdi

Mukalenge Yesù, bwà bwîmpè Bwèndè kùdì mwanàànyì.” Èè, nudi numòna’s, aci—aci’s ncilenga be, kàdi kwèna ulwa kùdì Mukalenge Yesù bwà nànkù to.

<sup>144</sup> Lwà mundankùlù, pa dîbà dikùmi ne ìbìdì, dîbà ùmwè mamwèndè kubàkulayè kalù kakesè. Ki mukàjì awu kwamba, kumubiikilayè, wàmba ne: “Maamù.”

Ki yèyè ne: “Èyowà’s, munanga wanyì, cyùdì ukèba ncinyì?”

Yèyè ne: “Udi mumanyè’s, ndi ne disànkà dyàbùngì be!”

Awu ne: “Ndi ne disànkà dyàbùngì dyà mùdì ne disànkà.”

Yèyè ne: “Ndi mu ditalala ne Nzambì.” Ki yèyè ne: “Kaa, mùshindù mwinè wùdìbì bilenga’s wè!”

Mu tusunsa tukesè, ki kubiikilayè cyàkàbìdì, wàmba ne: “Maamù.”

Awu ne: “Yě?”

Yèyè ne: “Nkàadi ngàalukila kumbèlu.”

<sup>145</sup> Ki awu ne: “Ndi mumanyè ne ukàadi uya.” Yèyè ne: “Èyowà’s, munanga wanyì,” yèyè ne, “ngàngàbukà neàpatula mwàna awu màalabà. Nènku dîbà adi bu ditùkù dimwè anyì àbìdì, pòndopìbwà mpùtà yèbè ne paùmukà kaaba aka, walukila kwèbè kumbèlu mwikàle cyàkàbìdì ne disànkà, wèwè ne bayebè ne bânà bèèbè batekète abu, kàdi ikàlà mwena Kilistò ne ikàlà ne mwoyi bwà Nzambì.”

Yèyè ne: “Maamù, ndi muswè kwamba ne nkàadi nya ku Nzùbu wanyì wa mu Dyulu.”

Awu ne: “Bushùwà’s, munanga wanyì, ku ndekeelu wa lwendu.”

Yèyè ne: “Ndekeelu wa lwendu’s ki yèyè ewu.”

“Kaa,” mwàkambà awu, “mpindyewu, mbwalu kaayì abu?”

<sup>146</sup> Yèyè ne: “Ndekeelu wa lwendu’s.” Ki yèyè ne: “Èyowà’s, maamù, mu katanci kakesè emu nêngiikalè muyè.”

<sup>147</sup> Èè, awu ùvwa wèla meeji ne ùvwa anu mubìndùlùke ne mujìmìje lungènyì. Kubiikilayè mungàngà mukàjì, mungàngà mukàjì awu kwangatayè mweyelu wèndè. Byònsò bìvwa ànu mu byòbì. Kàdi mu tusunsa tùtaanu yèyè ùkaavwa muyè, ùkaavwa mufwè.

<sup>148</sup> Nènku pashìishe pàngààkaalukilà kumbèlu, mu lumingu lùmwè anyì yìbìdì paanyimà pàa cyòci aci... ngeela meeji ne Mwanèètù Graham ngwàkayiisha ku citàlù cyà mwàna wa bakàjì awu. Pàngààkaalukilà kumbèlu ne Meda kungambilayè ne mwàna wa bakàjì awu wàkafwà dilòòlò adi, ekèlekèle, mèmè ncìvwa mufwànyìne... .

Mèmè—mèmè kuya kamòngana ne mamwèndè. “Èyowà.”

<sup>149</sup> Kàdi ncyè—ncyè—ncyèna mumanyè cyàkamfikishà ku dicyènza to, kàdi mèmè kwamba ne: “Mukalenge Nzambì,

ànu Wèwè—Wèwè mumpèèshe dyumvwija,” (Nwamònu anyi?) “paanyimà pàà mèmè mumanè kuya kuntwaku ne—ne mwambile bàyendè awu, ne yèyè mulwè kùdì Mukalenge paanyimà pàà Wèwè mumanè kumwenzela bintu ebi, ne byònsò byà mùshindù awu abi, kàdì pashiishe wangata mwoyi wà mwànà wa bakàjì awu mùshindù awu.” Mèmè ne: “Ànu Wèwè mumpèèshe dyumvwija.”

<sup>150</sup> Paùdì wambila Nzambì cintu cyà mùshindù awu, Yèyè neàkushiye musòmbè nkaàyeebè. Ncyèna . . . Yèyè kèna naanyi dibànza to nànsha dikesè. Mèmè ngudi mwena dibànza kùdì Yè. Èè, ki Yèyè kwanji kunshiya ànu mu dibungama dyanyi adi mu ndambu wa matùkù, nudi bamanyè’s. Nènku, paanyimà pàà ngondo mitwè ku yisàtù anyi yìnaayi, dīngà ditùkù mvwa nsanganyibwa ku mwelelu wà kasulù ne Mukalenge kwakulangana Yè naanyi mu cikèenà-kumòna, ne kwamba Yè ne: “Mpindyewu ndààku kùdì mamwèndè, ne wàmbilè mamwèndè nùnku: ‘Dìbà dyèndè kadikaavwakù dikùmbàne cidimu cimwè kumpalà kwà cyòci aci, pàvwàye ùfwa mu màyi mu musulù amu, mu lwendu lwà kadiila byàkudyà mu cisuku apu anyi? Bivwa bikèngela kwikalayè mufwè pa diinè dībà adi, kàdì byàkakèngela bwà Mèmè kumwangata pàvwàye mudìlongòlòle bwà kuya.’ Nènku ki bwà cinyi byònsò ebi mbyenzèke ne mbwà cinyi wèwè uvwa muyè kuntwaku.”

<sup>151</sup> Ki mèmè kutwà binù e kwasa mwadi. Mèmè ne: “Mukalenge Yesù, mfwilèku luse, mèmè musadidi Webè mukùtākàne mukwàte ne byà luse ewu. Kabivwa bikèngelakù bwà mèmè kwikala mwambè nànkù to, Mukalenge.”

<sup>152</sup> Ne mvwa mwalùkile kùdì inábànza awu, ùvwa musòmbèle lwà mwab’ewu mu mùsèèsù wà Market Street emu, ki mèmè kuya kùdiye, ne mèmè kwamba ne: “Ndi muswè nkwelekù lukonko.”

Yèyè ne: “Bushùwà’s, Mwanèètù Bill.”

Ki mèmè ne: “Ncyà bushùwà ne mwànà wa bakàjì ewu wàkamba kufwà mu màyi anyi?”

<sup>153</sup> Yèyè ne: “Ncyà bushùwà, Mwanèètù Branham.” Yèyè ne: “Bàyendè ne bòbò—bòbò byàkakèngela bwà kumupàtulabò mu musulù amu.” Ki yèyè ne: “Byàkakèngela bwà kumufikishabò ku dyeyela ne byamu, ne kumucìncimikabò, ne byàkabàkèngela kwangata màshinyi bwà kupàtula màyi munda mwèndè.” Yèyè ne: “Ùvwa ne jipè wèndè pambidi. Bàvwa bakadiile byàkudyà ku màyi. Kupàtukayè kuntwaku è kudyatayè pa lusenga kampàndà, kusenunukayè è kudikùma mutù panshi ne kufwilàye cipùukà mu màyi. Kabàvwa bamumòne to. Ki dyàkàmwè kumumònabò utùndubuka ne ùdiinà, ki kubwelabòmu ne kumukwàtabò ne kumupàtulabò.” Nènku yèyè ne: “Ùvwa mwambè kufwà mene.” Yèyè ne: “Yèyè . . .”

Mèmè ne: “Ki divwà dībà dyèndè dyà kuya ndyòdi adi.”

154 Nwamònu's, Nzambi mmumanyè cidiYe wènza. Mpindyewu, pàmwápa Mukalenge úvwa mufwànyine kwikala mucingambile bu ne ncìvwa mwangàte lwidi lúmvwà mwangàte alu to ne: "Mukalenge, Wèwè udi mwena dibànzà kùndi, bwà kungambila cyòci aci." Yèyè kèna neebè dibànzà dyà kantu nànsha kàmwè to!

155 Mvwa mwimàne mu disangisha dilòlò kampànda ne kuumvwa mutangadiki kampànda ùsambidila mubèèdi, wàmba ne: "Nzambi, ndi nKutùmina dîyi bwà wòndopè muntu ewu!" Nganyì udi utùmina Nzambi dîyi? Nwamònu anyi? Ka—ka—kacyèna—kacyèna mene cyà meeji to, nwamònu's, bwalu—bwalu Nzambi, Yèyè—Yèyè ùtu wènza cidiYe mswè kwenza.

156 Diima didikù—didikù mwà kwambila mufwìmbi ne: "Bwà cinyi udi mungenzè nùku" anyi? Nwamònu anyi? Nànsha kakesè! Kàdi bu mupròfetà mwà kushààla mupùwe ne pashiishe kukèbanganayè ne Mukalenge bwà dyandamuna, ki dyandamuna ndyòdi adi. Nwamònu anyi?

157 Ànu mùvwa muntu uvwa ukonka pa bwalu bwà—bwà—bwà dimiinu dyà nyòka awu, nudi numòna's. Tàngilàayi ànu—ànu cyanààna, ne kanwikadi—kanwikadi—kanwikadi mu dilwijakaja dinène to. Nènku dîbà adi, mpindyewu, Nzambi ùtu misangu yònsò ànu ùfikisha bintu byònsò ku dyenzeka bwà dyàkalenga dyà aba bàdi banangè Mukalenge.

158 Mpindyewu, bu—bu ne Ninìwà kàvwa munyingàlale to, dîbà adi manyooka a Nzambi's àvwa mwà kwikala pambidi pààbò. Mpindyewu vùlukàayi ne, mupròfetà uvwa ne cyà kutèèleja. Cìvwa ndidìmwija.

159 Mpindyewu, cintu cìmwècimwè aci bwà ditùngà edi. Pashiishe wèwè udi wamba ne: "Mwanèètù Branham, mu dyàlumingu dishààlè edi's uvwa mwambè ne 'Kakùcìvwa ditèkemena'?" Eyowà's! "Bwà cinyi?" Ndidyombòle dibìkila dyàdi. Bikèngela dìcimònè. Nedìcimònè. Kùlwalwa cikondo cìikalà ditùngà edi mwà kusùnsuka. Ngàkacimòna mu cidimu cyà 1933. Nwamònu's, mvwa mutàngile kule.

Wèwè kwamba, uvwa mufwànyine kwikala mwambè ne: "Èè, kacyàkenzeka dîbà adi to."

160 Kàdi's necyènzekè! Nànsha Mussolini kàvwa mu bukalenge to, anyi Cibumbà cyà Maginot kacìvwa ciibàkìibwe to, anyi mene kàshinyi kakàvwa kafwanàngàne ne diyi to mu miine matùkù awu, ne bikwàbò, anyi bakàji kabàvwa basungùle Mfùmù wa ditùngà uvwa mwà kwikala mufwànàngane ne mwànà mu—mulongi wa mu cìlongelu citùmbùke to, ne bintu bikwàbò byònsò ebi, anyi kakùvwa kwanji kwiikala Mfùmù wa ditùngà mwena Kàtòlikè to, ne bikwàbò, bìvwà byambiibwa abi to. Kùkaadi bidimu bitwè ku makùmi àsatù, anyi bipite apu, àvwa bintu ebi bidyanjila kwamba, kàdi Yèyè mmundeeje too ne ku ndekeelu.

161 Nènku pàdi cintu aci cyènda cìseemena, ku cikondo ne ku cikondo, lupànzà alu lùdi munkaci mwà kuula's! Pààbi

kanyinganyinga's nkayiishüübwe kùdì Billy Graham, Oral Roberts, ne bakwàbò. Bapròfetà, ne bakwàbò, mbakòsòlòle ditùngà edi ne bimanyinu ne maalu àà kukèma, kàdi nditùngùnùke ànu ne kwenda kutùkina mu mpèkaatù. Ki bwà cinyi kabèena bànyingalala to, kunyingalala nkùdì kucitwàla.

<sup>162</sup> Mònaayi, Aakàbà kàakanyingalalakù ku ditàndisha dyà Eliyà to. Bu ne Aakàbà wàkanyingalala ne mwendèku bitùùlùbitùùlù kumpàlà kwà Nzambì, nùnkù cintu aci kî ncyenzèkekù to. Kàdi Aakàbà wàkalwa kuntwaku è kwangatayè budimi bwà mvinyò bwà Naabòtà ne kumushebeyayè, ne bintu bibi byònsò ebi abi. Ne Izàbèlà. . . Mupròfetà awu kupàtukayè kuntwaku ne EMU MMÙDÌ MUKALENGE WÀMBA! Kàdi cyàkenzàbo bòbò ncinyi? Mukàji awu wàkafuuna ànu bwà kumushebeya. Cyàkenzekà ncinyi? Cipròfetà cyèndè aci cyàkuula, mbwa yàkamudyà ne yàkalàka mashi à Aakàbà. Ànu menemene bilondèshile díyì dyèndè! Yèyè wàkamòna lupànzà alu, lùle tètè.

<sup>163</sup> Ki bwà cinyi Miikà mukesè awu, wàmba cintu cimwècimwè eci, mmunyi mùvwayèkù mufwànyine kubènesha civwà Nzambì mwelè mulawu? Nwamònu's, díyì dyèndè—dyèndè, cipròfetà cyèndè aci, civwa cinwàngana ne Díyì.

<sup>164</sup> Helòòdè, yèyè kàakanyingalalakù to pàakambà Yone ne: “Kî mbyanya kùdì mikenji bwà wèwè kwikala ne awu, mukàj'a mwanèènu awu to!” Yèyè kàakanyingalalakù to. Kàdi cyàkenzàye ncinyi? Mukàjèndè awu wàkalòmba mutù wà mupròfetà awu. Tàngilàayi bukooya mwàkabwelàye abu. Tàngilàayi numonè cyàkamwenzekelà aci. Tàngilàayi, nànsha leelù ewu, mu Suisse, màyi à—à bleu à diMubènga awu's àcidi ànu àsàba bu—bu civùlukilu. Nwamònu's, ncyà bushùwà ne, yèyè kàakanyingalalakù to pàakamutàndishà Mukalenge. Yone wàkamwambila, nànsha yèyè mwikàle nganyì (procureur, anyi cyònsò civwàye aci; anyi mfùmù wa bukalenge bwalàbàle, anyi yònsò uvwayè mufwànyine kwikala awu), úvwa ne cyà kunyingalala pàdì Nzambì ùbìikila, cyanàànà ciiji cikalè cidi pambidi pèndè!

<sup>165</sup> Mmisangu bùngì kaayi mu bapròfetà. . . Ndi mufunde kaaba aka, kàdi katwàkupeta díbà to bwalu ndi mushàale ne tusunsa tutwè ku dikùmi.

<sup>166</sup> Pìikalàku kakùyi kanyinganyinga to, díbà adi mbitwishüübwe ne cilumbulwidi cidi ne cyà kulwa! Hezèkiyà wàkanyingalala. Nwamònu anyi? Ninìwà wàkanyingalala.

<sup>167</sup> Aakàbà kàakanyingalalakù to. Nèbukàndànèèsà kàakanyingalalakù to. Bantu bàà mu cikondo cyà Noà kabàakanyingalalakù to, ne cilumbulwidi kudikùmaci dyàkàmwè. Nwamònu anyi? Mpindyewu, kàdi Yèyè ùdi wànji kudimwija muntu yònsò. Muntu yònsò ùtu ùpeta didimwija.



168 Mpindyewu, pa kumòna ne cikondo cikaadi pabwìpì, muntu yònsò udi umvwa ne kùdi didimvwija awu, ànyingalalè ne lùkàsà lwònsò kumpàlà kwà cijì cicolè cyà Nzambì kudikùmacì.

169 Mpindyewu tucyàlùjaayi ku Branham Tabernacle. Nwamònu's, tudi bamòne bintu ebi ne bamanyè ne m'Bulelèlà. Tudi bamanyè ne Cyôci aci ki Bulelèlà bwà kabùyì kwela mpatà to. Mudimu mutùtùma naawù wa Dìyì wùdi ne: "Nwènu banyingàlèle ne babàtùjùbwe mu Dìna dyà Yesù Kilistò bwà dilekelediibwa dyà mpèkaatù yènu, nenùpetè kupà kwà Nyumà Mwimpè. Bwalu mulayì wùdi bwà bânà bèènu balela ne aba bàdi kuleekùle." Nwamònu anyì?

170 Mpindyewu, muntu kampànda, Mukalenge Dauch, mmunkonkè mwab'ewu ànu àbidi àdi panshì aa, wàmba ne: "Mwanèètù Branham, nyewù ngenda nkùlakaja. Ndi ngenda nteketa, bidimu makùmi citèemà ne cimwè." Yèyè ne: "Udi—udi wela meeji ne nkàadi—nkàadi pabwìpì ne kufwà anyì? Udi pèèbè wela meeji ne nkàadi pabwìpì ne kuya anyì? Udi wela meeji ne ndi musùngidùibwe anyì?"

171 Mèmè ne: "Mukalenge Dauch, ukàadiku muyè kwà—kwà ngàngàbukà bwà kudyènzeja mateeta à mubidi mujimà anyì?"

Yèyè ne: "Èyowà."

172 "Nènku ùkamwambilè... Mpindyewu, cidi ngàngàbukà wènza, ùdi ne mukànda mutèeka mwaba awu, nènku ùdi wàngata mukànda ewu ùjandula bwalu. 'Mpindyewu, cintu cyà kumpàla cìvwà cikèngelà bwà mèmè kwenzela muntu awu, nkumukenketa mwoyi.' Dìbà adi ùdi wàngata stètòskopè umwela mu dici, ùmukenketa mwoyi." Mèmè ne: "Pashìishe, cintu cidi cìlonda cidiye ùpeta, ùdi usangana lwendu lwèndè lwà mashi, mwikàle ne—mwikàle ne cipiminu aci ku dibòkò. Pashìishe cintu cyàlonda cyènzàye, ùdi wàngata ndambù wa mènysi, anyì cìkwàbò cyònsò, ne ùpàtula ndambù wa mashi mu yèyè amu, ne bintu bishùlèshùlàngàne byònsò ebi. Ùdi ùkenketa byònsò abi, kàdi yèyè kàyì mwà kupeta cintu nànsha cimwè to... Ùdi wàngata cyamù cyà mìdimà. Yèyè kàyì mwà kupeta cintu to, mmufwànyine kwamba ne: 'Mukalenge Dauch, wèwè udi—udi ne mubidi tumatuma.'

173 "Mpa cinyi pàdiye ùshindamijila cyôci aci? Pa mishingà yà mukànda wèndè wà maalu à dyondopangana awu, bwà ne kòkò cintu cibì bilondèshile mumanyi mukùlu necidileeje mwab'ewu awu, necyenzè *cikampànda* apa, necyenzè *cikansanga* pàapa. Pa nànku, bwà ku dyèndè dimanya pa bwalu abu, wèwè udi ànu bìmpè, nwamònu's, mu mubidi.

174 "Mpindyewu," mèmè ne, "mu ebu bwalu, mèmè ndi—ndi ngenza diteeta dyà musùukà. Nwamònu anyì? Nènku Nzambì, bwà musùukà, ùtu ne Cyamù ànu cimwèpelè, ncyà bushùwà, n'Dìyì Dyèndè. N'Dìyì Dyèndè. Ne Yesù mmwambè, mu Yone Munsantu 5:24 ne: 'Ewu udi umvwa Dìyì Dyànyì.' Mpindyewu,

*kuumvwa* aku kakwèna kùùmvwija ànu kutèèleja cyanààna mutooyi to. Aku *kuumvwa* kùdi kùùmvwija ‘kuDyàkidila.’ ‘Ewu udi mwà kwakidila Dìyi Dyànyi,’ amen, ‘ewu udi uDyùmvwà’s!’ (Kushààdiku mupùwe, wamba ne: ‘Kaa lukutukutu naanyi’s wè, bintu abi, kabyèna ne bwà nsongo to. Mémè ncyèna ngiitabuujà aci to.’) ‘Ewu udi umvwa Dìyi Dyànyi!’ Uh-huh. Adi’s n’Dìyi dyà Yesù didi ne, Yèyè ùdi Dìyi’s. Ki bwalu mbwòbù abu’s. ‘Bu wèwè mwà kuumvwa Dìyi Dyànyi,’ mwàkambàYe, ‘ne kwitabuujà Ewu udi muNtùme, yèyè wùmùkù ku lufù wàyi ku Mwoyi; ne kààkupìcilakù mene ku Cilumbulwidi to, kàdi wàmanyi kukùumua.’ Amen!” Mémè ne: “Mwoyi wèbè wùdi wùtuuta bishi mpindyewu?”

Yèyè ne: “Ndi nDìitabuujà. NgàDyùmVù. NgàDyàkìdidi.”

<sup>175</sup> Mémè ne: “Dìbà adi bilondèshile Mupilùke Munène, Mupandyanganyi Munène, Ngàngàbukà Munène wa Mwoyi wà Cyendèlèlè ùdi wamba ne: ‘Wàmanyi kuumuka ku lufù wàyi ku Mwoyi ne kwàdyàkupitakù ku dipiila to.’”

<sup>176</sup> Yèyè ne: “Pàngààkuumvwa uyiisha pa Dìna dyà Yesù Kilstò bwà dibàtiiza dyà mu màyi, ki mémè kukutwà mu nyimà ne wèwè kumbàtiiza.” Yèyè ne: “Ndi . . . Muntu ùmvwà musangu kampànda wàwa awu, ncicyèna kàbidì muntu awu to. Cintu kampànda ncingenzèkèle. Nciwvaku nDicyùka to mutungùnùke nya ànu njila mukwàbò awu, kàdi ngàkùdimuki ne kwalukila mu ewu njila. Ne mwoyi wànyi wùdi wùlàkuka kapyà muunya ne bufùku bwà kutàmba kuseemena pabwìpì Nendè. Dìyi dyònsò dyà cyàDì, ndi ngiitabuujà! Ndi ngàmba ne: ‘Amen!’ ku kantu ne kantu kààDì. Nànsha Dyòdì dintapa bishi, ndi muswè ànu kukùmbanangana naaDì. Ne ki cìndì mwenzè bwà ku dyànyi pàanyi dimanya.”

<sup>177</sup> Mémè ne: “Mbimwèke bu ne mwoyi wèbè wùdi wùtuuta bimpè menemene. Ndi—ndi ngiitabuujà ne udi mukùmbàne mu nyumà mpindyewu.”

<sup>178</sup> Yèyè ne: “Ndi ndikonka ní ki mwikalàbi pààlwà Dyambwibwa, nèngì-kalè mwà kubwela anyi, Mwanèètù Branham?”

Mémè ne: “Kì ncintàngìle mémè bwà kwamba ne nganyi udi ubwela anyi nganyi udi kàyi ubwela to.”

<sup>179</sup> Yèyè ne: “Èè, ndi muswè kushààla ne mwoyi, ndi njinga—ndi njinga ne mwoyi wànyi mujima kumòna Dyambwibwa.”

<sup>180</sup> Mémè ne: “Èyo, ngànji mmonèbi cìdi Mukàndà wa Maalu à mamanya awu—awu wamba apa, bwà bwalu ebu, ne maalu à mamanya à musùkà apa.” Mémè ne: “Èè, Wùdi wamba nùnkù, mu Tesàlònìkà Mwibidì, nshapità mwi5, m’Mwambè ne: ‘Twètù bàdi ne mwoyi ne bashààle too ne ku Dilwa dyà Mukalenge katwàkupangisha’ (mbwena kwamba ne ‘kucyàmakana’) ‘aba bàdi biikishe, balààle tulù to. Bwalu mpungi wa Nzambì neàdìlè, ne aba bàdi balààle tulù anyi biikishe nebàbiike

dyàmbedi, bàvwalè dibènga-kufwà. Pashiishe twètù bàdi ne mwoyi mu ditùkù adi, pa diinè dībà adi paanyimà pàà bōbō bamanè kubìika ku lufù, nwamònu's, dībà adi netùshintulukè mu katancì, mu mubùnyì wà dīsù, ne netùtwilanganè naabò; ne pashiishe netùbandè bwà katwilangana ne Mukalenge mu mpeepèle, bambwìbwe pàmwè naabò.' Wikalè mulààle, kwikadi mulààle, ní udi mulààle anyì ní kwèna mulààle; kwónsò kùdi mujiikiibwe aku, nànsha kùyi mujiikiibwe mene to, udi ulwa nànsha byà munyi! Kakwèna cidì mwà kukukànda to. Wèwè newikalèku!" Mémè ne: "Mwanèètù Dauch, Yesù kàyi mulwe too ne ku biikùlù bàà biikùlù bàà biikùlù bàà biikùlù bàà biikùlù bàànyì, newikalè ànukù mu katancì kakesè menemene, ne newikalèku kumpàla mene kwà bōbō kushintuluka, piikalàbi ne bàyaaya." Ncyà bushùwà. Amen!

<sup>181</sup> Kùdi dibènesha dīcilwalwà ànu mùdiku cijì cicolè cīcilwalwà amu. Kaa, bikèngela twikalè bindile cimwè cyà ku byòci abi dilòlò edi. Bikèngela wikalè mwindile anyì cijì cicolè bwà kudikùmaci pambidi pèèbè bwà kabùtù, anyì wikalè mwindile dibiishiibwa dyà ku lufù dyà kùdi Mukalenge Yesù. Nzambi umwèumwè wàkalaya cimwè awu, mulay- . . . Mémè ndi ne disànkà dyàbùngì!

Ndi mwindile dilwa dyà ditùkù dyà disànkà  
dyà Bukalenge bwà bidimu cinunu adi,  
Dyàlwà Mukalenge wetù mubènèshiibwe bwà  
kubàkula Mukàj'Endè-musèla udi mwindile  
awu kuya nendè;

Kaa! Mwoyi wànyì wùdi wùjinga wàmba  
kufwà ditùkù dipòlè dyà disùludiibwa adi,  
Dyàlukilà cyàkàbìdì Yesù wetù pa buloba.

Dībà adi mpèkaatù ne tunyinganyinga,  
bisaamà ne lufù byà pa buloba bwà mīdimà  
ebu nebìjikè,

Mu bukòkeshi bwà butùmbì bwà bidimu  
cinunu byà ditalala abu pàmwè ne Yesù.

<sup>182</sup> Kaa, ekelekele! "Ne netwikalè ne Mukalenge kashidi." Nwamònu anyì? Cidì Nzambi mwambè, cidì ne cyà kwenzeka. "Nebìibakè nzùbu, nebàsòmbelèmu. Nebàkunè madimi à mvinyò ne nebàdye tumuma twàyì. Kabààkukùna bwà mukwàbò kubìpyànayè to. Nebàkunè madimi àbò sungasunga à mvinyò ne nebàshaalè naawù." Amen! Amen! "Kabààkwenzelangana bibì anyì kubùtulanga mu Mikùnà Yànyì yònsò yà cijila to." Àlèluuyàh!

<sup>183</sup> Piikalà cyà cifwàkà eci mwà kuvwàla dibènga-kufwà, lufù elu—elu nduminyiibwè mu bucimunyi, dībà adi netùMumònè mùdiYe ne netwikalè ne mubidi mufwànàngàne ne Mubidi Wèndè Yèyè mwinè wà butùmbì awu. Kaa, cikondo kaayi cìlwàlwa's wè!

<sup>184</sup> Nzambi umwèumwè ne baprófetà bàmwèbàmwè bààkadyànjila kwamba Dìyì dyà Nzambi abu, anyi ciiji cicolè cìdì ne cyà kupòngolodiibwa, kupòngoloka abu, mbòbò kàbìdì bààkaakulà bwà mabènesha àcilwâlwa aa. Ndi ne disànkà dyàbúngì be! Kacya Nzambi kàtukù ùbùtula di—dìtunga ka—kampàndà kàyi mudìdimwije to. Yèyè kàtukù ùbùtula muntu kàyi mumudimwije bwà cyòci aci to. Nènku mpindyewu Yèyè wènza nànkù, tudi ne cintu kampàndà cìdì citwènzèkèlè, dishindika dyà bimanyinu byà matùkù a ndekeelu bìdì neetù, Nyumà Mwímpè munène awu ùkwàta mudimu munkaci mwètù ne ùùja èkèleeziyà ne Bwikadi Bwèndè, ùshindika Dìyì Dyèndè. Dìbà adi Èkèleeziyà ùdì munkaci mwà kudìlongolola ku dibàndà dyà mu maułu òmòwè dyà ku matùkù àdì panshì aa, ku bukolè bwà Nzambi. Bwalu ndidimwija bwà kutèeka ku luseke bujitu bwònsò ne mpèkaatù udi utùjìngila bipeepèlè nùnkù ewu ewu, bwà twamòna mwà kubùuka ne lutùùlù mu lubilu lùdì lutèeka kumpalà kwètù elu, batàngile kùdì Mubangi ne Mujikiji wa Diitabuuja dyètù.

<sup>185</sup> Nzambi ànùbènèshè, nwènú èkèleeziyà! Kwàtaayi ku cyanza cyà Nzambi cìdì kaciyi cìshintuluka! Èyowà's, mukalenge. Wèwè mumvwè Bwikadi Bwèndè, ndà kùdìYe. Kwòkò cintu kampàndà cibi mu mwoyi wèbè, cìlongòlòlè. Kì nkutùshààdile dìbà dyàbúngì to, Dilwa dyà Mukalenge dikaadi pabwìpi. Nudi baMwitàbùùje anyi? Kaa, èkèlekèlè! Aci kacya kwikalaku cilenga mwaba awu anyi? Cikondo kaayipu's wè, pàngààmòna bankòlomù bàà kale abu kuntu kwàka bèndakana mu Mpàlàdiizò awu! Kaa, èkèlekèlè! Ndi mwindile diinè dìbà adi.

<sup>186</sup> Ndi mvùluka múmwà muumvwè mwanèètù wa balùme wàmba, mu dyalukila dya kufùma dyàmwmwà dyà mbù, kuumukila mu byalu byà kale byà mvità ne bikwàbò, kwambayè ne: “Bankòlomù bàà kale abu, pàakatwàbo mèsù ku Lupìngù lwà Budishikaminyi alu, ne kunyùngulujabò bikalàbà abi kuulu aku bwà kumònabì Lupìngù lwà Budishikaminyi alu.” Ki cyùdì umòna kumpalà, mu màzuwà à màyi, paùdì useemena apu, bwalu ndutùmbùke muulu menemene. “Nènku kumòna dibòko adi, diimàne mwab'awu,” bóbò ne, “bantu abu bàtu ànu bakùtula mwadi badila. Nènku bantu ànu banène bèètù bàà menemene aba biimàne mwab'awu, kudyupwilabò panshì pa ciimanyinu cya màzuwà è kukùtulabò myadi.” Cìvwa ncinyi? Cimanyinu cyà budishikaminyi. Byònsò bìvwàboku banangè bìvwa bisanganyibwa paanyimà mene pàà cimanyinu aci.

<sup>187</sup> Kaa, kàdì nebiikalè cinyi pangùumvwà màzuwà à kale à Sìonà èla mpungi mu dindà adi ne mmòna màbèndelà awu àpeepa! Pààjikà mvità ne bucimunyi bwangaciibwa, àlèluuyàh! Nènku tudi twalukila Kumbèlu, kùdì lufù, mpèkaatù ne ifèrnò bicimunyiibwe; ne kakùciyi kàbìdì mpèkaatù, anyi lufù, nànsha tunyìnganyinga to. Ndi mwà kuumvwa ànu tushibà tùdila! Kaa, tukààdì twenda tuseemena pabwìpi ne Cimenga aci. Èyowà's,

mukalenge. Ntutu yà mavwala yènda yilwa, màzuwà à kale awu ènda àbwela mu mwaba wàwù. Nzambi, twàmbùlwishèku bwà twikalè ne mwoyi bwà ditùkù adi!

<sup>188</sup> Mukalenge Yesù, tudi bantu bàdi—bàdi bàteetà kwenza ne mwètù mwònsò, ne byònsò bìdi munda mwètù, bwà kwendela mu Bukênkè bwà èvàngeliyò wa Èvànjeeliyò Webè munène uWàkafwilà bwà kulongolola awu. Tudi ne kusàkidila kwàbúngì bwà kumòna, mu matùkù mabì à mîdimà aa mutùdì ne mwoyi mpindyewu mu díbà edi aa ne, tudi tumòna bimanyinu munkaci mwà kumwènèka. Éyì Nzambi, bu mufùndu ku cimanu, tudi tuKusàkidila, Mukalenge, bwà mutùdì mwà kucimòna ne kumanya ne disungidiibwa dikaadi pabwìpì. Tudi tuyiisha, tudi tukosolola ditùngà, tudi tuKumona wenza bimanyinu binène, uDileeya ku ditùkù ne ku ditùkù, ku cidimu cyònsò. Kakwènàkù cidimu cipita cidi bimanyinu Byèndè (binène) Bitàmbe mfùkilu abi kabìyi bilenga buloba to. Nènku tudi tucimòna, bamanyè ne cilwilu cinènè cyà Nzambi ncutungùnùke ànu ne kwenda.

<sup>189</sup> Kaa, kabàyi bààbúngì to, kàdi musùmbà kàayi wà bukolè wùdi ne Mwoyi wà Cyendèlèlè's wè! Mmwàmbe ne: “Nebàdyélè mu cisùmbù cyà màsàlaayi ne bàtùpikila pa cimanu.” Éyowà's, “cisùmbù” cyà lufù aci kacyakwikalapù ne bya kucikwàte to, Yèyè neàpicile ànumù lubilu. Bàtùpikila pa “cimanu” pankaci pàà cyà mubidi ne Citambe-mfùkilu, ne badyèla mu mabòkò à Nzambi, mu Cyendèlèlè cinène aci. Mukalenge Nzambi, tudi tuKusàkidila bwà bwalu ebu. Tudi bamanyè ne cikondo cikaadi cyènda ciseemena pabwìpì.

<sup>190</sup> Ndi ndòmba, Nzambi, bwà ne dilòlò edi kwòkò muntu mwaba ewu kàyi muKumanyè, ùtu kacya kàyikù mwanji kupeta ditalala dyèndè. . . Nènku pàmwàpa dilòlò edi, patùvwà twakula apu, kaaDìyi kakesè nkaakule munda mwà mwoyi wèndè amu ne: “Ndi nguuvwa didimwiija dyà ne ncyèna mwà kunènga pànu bitambidile to.” Éyì Nzambi wa yàaya, swàku bwà àteekè nzùbu wèndè mu bulongàme, mpindyewu mene. Byònsò bilongolodiibwè. Swàku bwà dikwàcika dyà mashikà. . . Pàmwàpa mbeena Kilistò, kàdi kabèena ànu ne. . . Mbashàale mu cyòci eci ntàntà mule bikolè ne bamònèmòne bintu búngì cyanààna, mu mùshindù wà ne bà—bàkaadi ànu bajimije mushinga wàCi. Cidi. . . Bintu ebi, bàdi bàbyàngata ne mapepelela pamutu pàà kubyàngatabò mu ndòndò ne meeji matòòke.

<sup>191</sup> Éyì Nzambi, tùkenketèku dilòlò edi, enzàku nàнку, bamanyè ne bintu binène ebi bìdi ànu bitùdimwija bwà dyambwibwa dyà Èkèleziyà dikaadi dilembèlèle edi. Nènku twètù bambùle majitu a mpèkaatù, ne bupidyà, ne lulèngù alu, katwàkuyakù mu Dyambwibwa adi to. Tudi bacimanyè, Mukalenge, pa nàнку tudi tulòmba bwà Wèwè kulàkusha kapyà munda mwètù ne Nyumà Mwimpè, munda mwà myoyi yètù. Éyì

Nzambì, lakushakù misùùkà yètù ne kapyà kàà mabènesha Èbè. Tùkwàcishèku bwà twètù kuumvwa.

<sup>192</sup> Mpindyewu, bèleshàku bantu bònso pàmwè. Bèleshàku mpaasàtà wetù wa mashinga mukolè ewu ne mukàjèndè. Bèleshàku balami, balubuludi, beena kwitabuuja bònso, pàmwè. Tùfwilèku luse ku mpèkaatù yètù. Ondòpàku mabèèdi ètù, Mukalenge. Ne tèèmèshàku myoyi yètù ne kapyà. Ne tùùmukèku mwab'ewu ne mukenji wà didimwija, patùdi tutwilangana ne bantu bàdi mu mpèkaatù, ne tubàmbila ne: “Mulundà wanyi, kwènàku ne bundù mùdi wenza bintu byà mùshindù awu anyi, pèèbè mumanyè ne bìdi bikèngela ùtwilanganè ne Nzambi dīngà ditùkù?” Enzàku nànkù, Mukalenge. Nyewù mbàlàmbula Kùdi, mpindyewu; ndàmbula Diyisha, ne bònso pàmwè, bwà kukwàtabò mudimu pàmwè bwà butùmbi Bwèbè. Mu Dīnà dyà Yesù Kīlistò. Amen.

Ndi muMunangè, ndi muMunangè  
Bwalu Yèyè wàkannanga kumpàla  
Ne wàkampetela lupàndu  
Pa mucì wà Kàlvaryò.

<sup>193</sup> Kanwènaayikù baMunangè anyi? Elàayibi meeji bwà citùdi. Tàngilàayi kutùkaadi bafikè mu njila, balundà bàanyi. Pingàjaayibi ànu mèsù paanyimà mu njila kubangila lwà kwinshì kwàka, mu matùkù à Luther ne à Wesley, mu bikongo byònso amu. Tàngilàayikù kutùkaadi: ànu lwà ku lusongo lwà cipaapu cyà musàkà eku; ànu apa mene pàdi Nzambì mucijaadike apa's ne, ku bitampì mwandamutekète Bible mmubuulùdiibwe ànu menemene; bindile ànu mpindyewu bwà maalu-masokoka mwandamutekète awu ku ndekeelu mene, pa Dilwa dyà Mukalenge ne Dyambwibwa dyà Èkèleeziyà bìdi bifwànyine kwenzeka kumpàla kwà mu dīndà abi. Kaa, ekèlekèle!

Ndi muMunangè . . .

Ne meeji matòòke ònsò mpindyewu.

. . . ndi muMunangè  
Bwalu Yèyè wàkannanga kumpàla  
Ne wàkampetela lupàndu  
Pa mucì wà Kàlvaryò.

<sup>194</sup> Patùdi mu cimùmà mpindyewu apa . . . Nudikù nufika ku dyumvwa ne yònsò wa kutùdi mwab'ewu ùdi ne cyà kuumuka kaaba aka, kushìnyangana ne buloba ebu anyi? Nudikù bamanyè ne muntu mulela kùdi mukàji ngwa matùkù makesè menemene ne miinè awu mùle tètè ne lutàtu anyi? Nukààvwakù bamanyè ne bwalu tudi balediibwe ku mucì wà mu budimi bwà Edènà, wà lufù awu, ne tudi ne cyà kufwà anyi? Twètù tudi mamuma à munda mwà mamwètù, ne butùdi naabù mbwà kufwà, butùdi naabù mbwà kutàpuluka ne mwoyi ewu. Bānà anyi bakole, kakwèna dishiilangana to. Muntu mulùme anyi mukàji udi

mutambe kwikala mununu mwab'ewu bu yêyè mwà kushààla ne mwoyi too pàcyà bufukù ebu, mukàji awu anyi mulùme awu's neàlaalè kupìta bânà bàà bidimu dikùm-, dikùmì ne bitaanu anyi? Bòbò abu nkàma s'nebàfwe pa buloba bujimà apa kumpàla kwà kucyàbu mu dindà, bàà ku bânà abu's. Pa nàнку cìdì ne bwalu mu byònsò abi, cìdì ne, cyùdì wenza mpindyewu mene ncinyi?

<sup>195</sup> Ewu's mmufwànyine kwikala webè mpùngà wa ndekeelu. Mwànà anyi mukolè, ùdì mwà kufika ku èkèleeziyà. Kushiyikù cintu nànsha cimwè kacyi cyenza to. Ikàlàku ne meeji matòòkè à mu ndòndò. Tèèka mpèkaatù ne mpèkaatù yònsò ne kantu kònsò ku luseke. Tàngilà buludì Nzambì mu mpàla wèlè lukonko elu ne: "Mukalenge, ndikù nKusankisha anyi? Ncinyi cikwàbò cìndiku mwà kwenza, Mukalenge Yesù? Ncyàkupetakù kàbìdì mpùngà to, paanyimà pàà mwoyi ewu mumanè kujika, wa kuKukwàcila mudimu. Eci ki cikondo cimwèpelè cìndiku naaci. Mukalenge Nzambì, mmanyèku ànu cyÙdì muswè bwà kwenza! Ní bìvwa bikèngela bwà ngènzè *cikampànda* anyi bikèngela bwà ngènzè *cikansanga*, ndi mufwànyine kucyènta ne disànkà dyònsò."

<sup>196</sup> Tudikù—tudikù twela meeji awu ne meeji matòòkè anyi? Bânà bakesè bàdikù bèèla meeji awu anyi? Bantu bashindàme bàdikù bèèla meeji awu anyi? Bakùlumpè bàdikù bèèla meeji awu anyi? Bansongà bàdikù bèèla meeji awu anyi? Butùdì nnaabù mbwà kuya, kàdi mmunyì muwàmanyà ne twètù bònsò katwàkwikala bayè pàmbàbu kucyà mu dindà? Katwèna bacìmanyè to. Udi wamba ne: "Aci cìdì cintàcisha lungènyi." Kabìvwa bikèngela bwà cikutàcishè to! Bwà kwamba menemene, bìvwa bikèngela cìtambè kukuvwija ne disànkà dyà kumanya ne udi ushiyangana ne nzùbu wa kale wa beena cikupi ewu.

<sup>197</sup> Kùdì buloba bukwàbò. Kabyèna bikèngela bwà wèwè kuumuka kuya ntàntà mule to. Bùdì neebè mwab'awu mene. Bùdì ànu pabwìpì neebè apu. Udi ànu...wèwè...Nzambì mmukupèeshe ànu byumvwilu bitaanu cyanààna, ne mbwà kupetangana ne ebu nùнку, buloba ebu. Kàdi kùdì búngà buloba bùdì kùyì ne byumvwilu bwà kupetangana naabù to, kwèna mwà kupetangana naabù to mbwalu kwèna naabi to.

<sup>198</sup> Cileejilu, mvwa mwambè, mu dyàlumingu dilòòlò, (kanùvwa pàmwàpa bacyùmvwè to) ncinyi. . .tudi ne byumvwilu bitaanu: lumòndò, lulabulu, lulengu, lununku, ne luumvu. Kàdi ambà túng bu ne kùvwa ne lumòndò (mwikàle ànu ne lulabulu, lulengu, lununku, ne luumvu), ne muntu kampànda mwikàle mupetè lumòndò lwèndè kwambayè ne: "Kùdì búngà buloba, ndìbà dyà muulu"? Byumvwilu abi—abi, udi udituuta ku bintu, ne cidìci aci ncìdì mwà kukwambila cìdìci. Mòna's, udi mufwànyine kwela meeji ne muntu awu mmupàle, bwalu wèwè kwèna ne cyumvwilu aci—aci—cyà lumòndò aci to. Kacya muntu kàvwakù naaci to, wùdiku mumanyè. Ukààdiku mumvwè bantu bàmba

bintu bu nàнку, kàdi ubyèla mpatà. Kàdi tudi tumanyina ku cyumvwilu eci ne ncyà bushùwà. Mmwaba wà cyà bushùwà. Nwamònu anyì? Cìdi—cìdi—cìdi—cìdi mmwaba wùdi. . . wùdi mwà kumòna. Cyumvwilu cyèbè cìdi cyàmba cyòci aci patòoke.

<sup>199</sup> Mpindyewu, cintu cimwèpelè cyùdi wenza paùdi ufwà, udi ànu ushintulula byumvwilu bitaanu abi cyanààna (Butùmbi's wè! Yoyòyò!), udi upeta ànu cyumvwilu cikwàbò. Kàdi udi ne mwoyi mwikàle ne cyumvwilu citàmbe kutùmbùka, citùmbùke misangu binunu kutàmba eci nùнку, mu mwoyi mukwàbò; mu mwoyi mùdi kamùyikù lufù, kamùyikù tunyinganyinga nànsha. Ne bintu byùdi kùyikù mumanyè kantu nànsha kàmwè pa bwalu bwàbi mpindyewu abi, udi ubimòna bitòoke tò paùdi uya dyàmwàmwa. Kwèna ubyùmvwu mpindyewu to bwalu udi udituutamù, kùyi ne cyumvwilu aci to. Wèwè udi wamba ne: "Ndi—ndi ndyùmvwu mùshindù wà pabwàwù mwaba ewu dilòdò edi. Bwànyì mèmè bìdi ànu bu ne kùdi. . . Ndi muswè ànu kwela mbilà, anyì kwela mikunda, anyì cintu kampànda." M'Banjèlò bàà Mukalenge abu. Nwamònu anyì?

<sup>200</sup> Byenzè mùdi muntu wàmba, nudi bamanyè's, udi kacya kàkù ne cyumvwilu cyà lumònò to, wàmba ne: "Ku musangu ne ku musangu ndi ngumvwa cintu kampànda cyà cilelèla, cyenzè bu dyumvwa dyà luuyà."

Wèwè udi wamba ne: "Mbukènkè bwà dìbà."

<sup>201</sup> "Bukènkè bwà dìbà ncinyi? Kacya ncitukù mwanjì kubùmòna to." "Kakùtukù. . ." Nwamònu's, yèyè katukù mwanjì kubùmòna to, kí mmumanyè ne ncinyi to. Nwamònu's, bikèngela muntu mwómò amu àmwambilè, muntu kampànda udi mwà kubùmòna. Kaa, ekèlekèle! Nwamònu anyì?

<sup>202</sup> Twètù tùtu ànu tushintuluka cyanààna. Tùtu ànu tushintuluka, katwèna ne bwòwà bwà lufù to. Lufù kalwèna cìngà cintu to ànu cìfwèbà cyanààna. Yesù wàkalùcimuna. Nànsha pàakafikà Pòlò ku ndekeelu, wàkamba ne: "Lufù, kalonda kèèbè kàdi penyì? Bwòwà bùtu upèeshangana bùdi penyì? Lukità, bucìmunyi bwèbè bùdi penyì? Wamba pèèbè muwàmpeci mèmè? Ndi—ndi muswè nkufunkwinè paanyimà pààpa ku Yelusàlèma. Kùdi lukità lwà munda mutupù kuntwaka ne 'Mèmè kí wàkanùcimuna nwènù byònsò bibidi, lufù ne ifernò,' ne mèmè ndi munda Mwèndè ne wèwè kwèna mwà kundama to! Nèmbiikè ku lufù." Kaa, ekèlekèle! Yèyè ne: "Kùdi cifulu cyà butùmbi cinteekela, ciikalà Mukalenge, Mulumbulwishi mwakàne, mwà kumpèesha; ne kí ng' ànu mèmè nkààyanyì to, kàdi bònsò bàdi *banangè* dimwènèka Dyèndè."

<sup>203</sup> Udi muMunangè. Udi muswè kuMumòna ùlwa. Udi muMwindile. Mbwalu bule bè, ndi—ndindila dile. Mbwalu bwà mananga. Kàdi mbikolè bwà kwindila too ne pawàMumòna's! Kaa, ekèlekèle! Kì mùshindù wùdibi ngwòwò awu. Kaa, kí cikondo citùdi bindile ncyòci aci, kí dìbà ndyòdi adi!



Piikala mwoyi wèbè kawùyì nàнку—nàнку—nàнку dilòòlò edi to, mulundà wèwè wanyì, wadimuka. Wamònu anyi? Wadimuka. Kùlekedikù mwena lukunà ùkuseeswisha to. Pàdì Nyumà Mwímpè munda emu Ûswa kubùùka mutàngile kùdì MuMufwimbi, kùdì Mfùm w'Èndè, kùdì bwalu bwà mananga bùdì muntu nànsha umwe kàyi mwà kulondelangana to. Ncyà bushùwà, ncilelèlà. Ncilelèlà.

204 Pa nàнку kwòkò didimwiija, dyàmba ne: “Kwèna mudilongòlòle ku cyòci aci to,” dībà adi wavùluka ne, Nzambi mmufwànyine kwikala ùkulongolola ku cintu kampànda. Wamònu anyi? Kwèna mudilongòlòle. . .

205 Wèwè udi wamba ne: “Èè, mèmè mubàtìjìbwe, Nyumà Mwímpè, dībà adi, èè, pàmwàpa Mukalenge neàngangàtè anyi?” To, kí ng'anu aci to, dībà adi udi ànu pa kubanga kwikala ne mwoyi. Kwèna—kwèna mudilongòlòle bwà kwikala ne mwoyi paùdì kùyì mupetè Nyumà Mwímpè to, ne pashìshe paùdì upeta Nyumà Mwímpè dībà adi ndyùdì mukùmbànyine kwikala ne mwoyi. Kùvwa mukùmbànyine kwikala ne mwoyi kumpàlà kwà cyòci aci to, wamònu's, kàdi mpindyewu ngùdì mukùmbànyine kwikala ne mwoyi paanyimà pàà wèwè mumanè kupeta Nyumà Mwímpè. Wamònu anyi? Ùkulongolola ànu cyanànà. Wamònu anyi?

206 Bantu bàtu bàmba ne: “Èè, bikèngela ndilongòlòle bwà kufwà.” Kaa, ekèlekèle, mèmè ndi ndilongolola bwà kwikala ne mwoyi! Amen. Bwalu bùdì ne, dilongòlòle bwà kwikala ne mwoyi, kwikala ne mwoyi mu Kilistò! Nsòmbelu wa bucimunyi pa mpèkaatù, pa lufù, pa ifernò, nkààdi mumanè kupeta bucimunyi. Yèyè mBucimunyi bwànyì ne mèmè ndi cileeji Cyèndè, ne mèmè ndi cileeji cyà Bucimunyi Bwèndè. Amen! Ki cyòci aci.

207 “Mmunyì mùdì umanya ne udi muBùpetè?” Mèmè's ndi muBùpetè. Amen. Yèyè mmuBùmpèeshe ku ngàsà Wèndè. Ndi mBùumvwa. Ndi muBùmanyè. Ndi mBùmòna bùkwàta mudimu mu mwoyi wànyì. Mbunshintùlùle. Ne bilondèshile Mukàndà ewu, Yèyè mmwambè ne ngàkapeta Mwoyi wà Cyèndèlèlè ne ncìvwa mwà kupicila ku Cilumbulwidi to, kàdi ndi muumùke ku lufù muyè ku Mwoyi bwalu Yèyè wàkangambwila cilumbulwidi cyànyì bwànyì mèmè. Nenku piikalaYe mufutè mushinga, kùteecikù bwà kumfikisha ku Cilumbulwidi kampànda to. Yèyè wàkamana kucingambwila, ne mèmè ndi mucitàbe. Eyowà's, mukalenge.

208 Pa nàнку kakùcyèna kàbidì cilumbulwidi to. Kakùcyèna kàbidì—kàbidì lufù to. Kaa, nebikengelè bwà mèmè kushiyangana ne èkèleeziyà ne kushiyangana ne bantu dîngà ditùkù, kàdi aci. . .bu Yesù mwà kunènga. Kàdi aci cyòci cyenzèke, mòna's, ekèlekèle, ncyèna mufwè to. Ncyèna mwà kufwàku to, ndi ne Mwoyi wà Cyèndèlèlèlè. Mmunyì mùdiku

mwà kufwà eku mwikàle ne Mwoyi wà Cyendèlèlè? Nwamònu anyi? Misangu yònsò ànu mu Bwikadi bwà Nzambi ne kashidi nêngiikalè Nendè! Amen! Aci's cidi cìtùpisha mwoyi wànyì ne disànka, ekèlekèle, cingenza bwà njingè kutwàdija kuyiisha cyàkàbìdì. Nwamònu anyi? Ncyà bushùwà. Kaa, Yèyè's mMulenga bè!

Yèyè kî mmulenga, mulenga, mulenga anyi?  
 Yesù Mukalenge wanyì kî mmulenga anyi?  
 Mèsù mmamòne, maci mmumvwè, bidìbo  
 bafunde mu Dìyì dyà Nzambi;  
 Yesù Mukalenge wanyì kî mmulenga anyi?

Ntu munangè bujaadiki abu.

Mèsù mmamòne, maci mmumvwè, bidìbo  
 bafunde mu Dìyì dyà Nzambi;  
 Yesù Mukalenge wetù kî mmulenga anyi?

<sup>209</sup> Kaa, ndi muMunangè! Yèyè ki dyànyì Ditalala, wànyì Mwoyi, dyànyì—dyanyì Ditekemena, wanyì Mfùmù, wanyì Nzambi, wanyì Musungidi, wanyì . . . (Kaa, ekèlekèle!) wanyì Taatù, wanyì Maamù, wanyì Yààyà, wanyì Tùùtù, wanyì Mulundà, byànyì byònsò! Nudi numòna anyi? Tuvwa ne ciibidilu cyà kwimba kaamusambu kakesè kàà mùshindù awu. Nudi bamanyè's, nùtuku nwénù nupeta tuumisambu tukesè twà cyena-Mpenta atu bu mùdì . . . Ndi ntèkemena ne mbakàngè cisanjì cidi cìkwàta mèyì aci. Hmm. Utùvwà ne ciibidilu cyà kwimba awu ngwèpì?

Yèyè ki wanyì taatù, wanyì maamù, yààyànyì  
 ne tùùtwànyì,  
 Yèyè ùdì byònsò bwànyì.  
 Yèyè ùdì byònsò, Yèyè ùdì byònsò bwànyì;  
 Yèyè ùdì byònsò, Yèyè ùdì byònsò bwànyì;  
 Bwalu Yèyè ki wanyì taatù, wanyì maamù,  
 yààyànyì ne tùùtwànyì,  
 Yèyè ùdì byònsò bwànyì mèmè.

<sup>210</sup> Nudi nuvùluka patùvwà ne ciibidilu cyà kwimba nàнку anyi? Yònsò wa kunùdì mmuvùlùke anyi? Ekèlekèle, kukaadi bidimu's wè! Nènku dìbà adi tuvwa ne ciibidilu cyà kwamba ne:

Ndi mumanyè ne cìvwa m'Mashi, ndi mumanyè  
 ne cìvwa m'Mashi,  
 Ndi mumanyè ne cìvwa m'Mashi bwànyì mèmè;  
 Dìngà ditùkù pâmvwà mujimìne, Yèyè  
 wàkafwà pa Nkùrusè,  
 Nènku ndi mumanyè ne cìvwa m'Mashi bwànyì  
 mèmè.

<sup>211</sup> Nudi bavùlùke kaamusambu kakesè aku anyi? Twànjààyìbì kumòna, kakwàbò katùvwà twimba aku kàvwà kàà bishi apa's? Twanjààyìbì kumòna tùng.

Kaa, kwênàku muswè kushààla naanyì  
mutàbàle dībà dimwèpelè,  
Pâncidì nya kwàka apa, pâncidì nya kwàka apa  
anyì?  
Kaa, kwênàku muswè kushààla naanyì  
mutàbàle dībà dimwèpelè,  
Pâncidì nya kwàka bwà kusambila apa anyì?  
Ndi ncimuna, ndi ncimuna,  
Ndi ncimuna, ndi ncimuna;  
Bwalu ndi munangè Yesù, Yèyè ki Musùngidi  
wanyì,  
Ne Yèyè ùdi ùfùkisha mimwemwe ne Ùnnanga  
kàbìdi.

<sup>212</sup> Kale wàwa ùvwa m’Mwanèètù Smith, mwanèètù wa balùme wa bafiike, uvwa lwà kwinshì eku mu disangu emu. Kaa! Mvwa ntèeleja bantu bàà bafiike abu kuntwaku, mvwa ànu nsòmba mwaba awu ngeela mbilà mikolè ndila mwadi ne bikwàbò byònsò, nyùkusha kàshinyì kàànyì kònsò ntùpika ngenda nkànyùnguluka mùshindù ewu. Bònsò bàvwa bàtuuta bikàshi.

Kaa, kwênàku muswè kushààla naanyì  
mutàbàle...

Dituuta dikesè òvwà naadì bantu bàà bafiike abu adi, nudi bamanyè’s. Muntu nànsha umwe kènàku mwà kwimba mùmwè naabò to; kuteeciku to. Nwamònu anyì?

... dībà dimwèpelè,  
Pâncidì nya kwàka kwàka apa,...

<sup>213</sup> Kaa, ekèlekèle! Mèmè kusòmba mwaba awu, kwamba ne: “Èyì Nzambì wa yààya!” Kànà kakesè kàà balùme aka, ne bidimu bitwè ku makumi àbìdì, Mvwa nyeema ngenda nyùnguluka kàshinyì aku ngèèla ànu mbilà ne ntùmbisha Nzambì mùshindù awu. Kaa, cikondo kaayipu’s wè! Aci’s cívwa ànu ku mbangilu menemene, pàvwa ànu Nzambì ùtwa eku ùtwa eku munkaci mwà bantu mùshindù awu. Mpindyewu twàlu Èkèleeziyà wa dikàndà. Kàyi wa bidimba byàbùngì to, kàdi wa bukolè mu Nyumà. Amen. Bilenga’s wè!

<sup>214</sup> Pashiishe kale wàwa kùvwa kaamusambu... Ndi mvùluka ditùkù dya kuntwaku mu Chattanooga, mu Tennessee mwàmwa, pangàakatwilanganà ne ewu... Kamùvwa mu Chattanooga to, mùvwa mmu Memphis, mungàakatwilanganà ne mukàjì mukesè wa bafiike ewu, nudi bamanyè’s, mwimàne mwaba awu. Nukààdikù bangumvwè ndonda bwalu abu, nudi bamanyè’s. Mwanèndè wa balùme ùvwa ne disaamà dya māsàsà. Ne ùvwa ne mutèèlù wa bânà balùme muswika ku mutù, mweyèmène ku cibàsà nùnkù ewu. Ki Mukalenge kwimanyika Yè ndèkè awu kuntwaku ne kàyikù muswè bwà kuyayè to, mu mùshindù kampànda, ne kungambilabò bwà mèmè kulwa kwangata...

Ki Nyumà Mwîmpè kwambaYè ne: “Enzà kaalwendu kakesè ùpwekè mutàngile lwà *eku*.”

215 Ki mêmè kupweka mpicila kuntwaku, ngenda ngimba. Mêmè kudyâmbidila ne: “Ekèlekèle, ndèkè wanyi’s ùkaadi pa kuya!”

216 Mutùngùnùke ànu ne kwamba ne: “Tùngunukà. Tùngunukà ànu ne kuya. Tùngunukà ànu ne kuya.” Ànu citùpà cyà mbangilu cyà mudimu wanyi wà bwambi’s.

217 Ki ngeela mèsù, mweyèmène ku ciibi cyà lupangu, ne kazùbu kakesè kenzè ne luse, mu kaaba kakesè kuntwaku. Kùvwa mwanèètù wa bakàjì mukùlumpè mwimànekù. Kaa, ùvwa . . . Ne mmwènekeli wa umwe wa ku bânà beètù bàà bakàjì benji bàà maakrepè à Tàntinè Jemima aba. Ne matàmà manènè à maanyi, nudi bamanyè’s, ne nsuki yèndè—yèndè ayi, mutèèlù mwaluja paanyimà. Úvwa mweyèmène ku ciibi aku nùuku ewu, ki mêmè ànu. . . Mvwa ngimba kaamusambu kakesè aku kàà ne. . . kakesè. . . Ncinyi cìvwà. . . Ngăpù mwoyi dînà dyà kaamusambu kakesè kâmvwà ngimba aku’s. Mpindyewu, ncintu cyà—cyà. . . Kàvwa nkaamusambu kakesè kàà mukùmà kàà cyena-Mpenta, kàà cyanga kakesè.

218 Ki mêmè kumbà kulekela kwimba, mêmè kuseemenena pabwîpi menemene. Ki mêmè kuya too ne mwab’awu. Ne yêyè ùvwa mwimàne mwaba awu ne binsònjì bimupwekela pa matàmà manènè a maanyi awu; mvwa muswè kumuupukila. Kwambayè ne: “Mwoyi awu, mpaasàtà!”

Mêmè ne: “Mwâbânà, udi muswè kwamba cinyi?”

Yêyè ne: “Ngămbi ne: ‘Mwoyi awu, mpaasàtà.’”

219 Mêmè ne: “Wâmanyi bishi ne ndi mpaasàtà?” Mpindyewu, bwà bantu bàà mu Sud, aci mbwena kwamba ne “mwambi,” nudi bamanyè’s. Mêmè ne: “Mpindyewu, Wâmanyi bishi ne ndi mpaasàtà?”

Yêyè ne: “Mvwa mumanyè ne wêwè uvwa ulwa.”

220 Mêmè ne: “Uvwa mumanyè ne mvwa ndwa?” Mêmè kudyâmbidila ne: “Uh-oh, s’ki bwalu mbwôbô ebu, wamònu’s.”

221 Yêyè ne: “Ëyowà’s, mukalenge.” Yêyè ne: “Ukààdikù—ukààdikù mubalè bwalu-bulonda mu Bible abu, mpaasàtà, bwà mukàjì mwena Suunèmà awu anyi?”

Mêmè ne: “Ëyowà, mwâbânà, nkààdikù mubùbalè.”

222 Yêyè ne: “Mêmè mvwa mukàjì wa bwena yêyè awu.” Yêyè ne: “Ne mvwa mulòmbe Mukalenge ne bu Yêyè mwà kumpà mwânà, mêmè ne bàyaanyi, mvwa mwà kumukolesha Bwèndè Yêyè.” Yêyè ne: “Kumumpèèsha Yè, kumpèèsha Yè mwânà awu.” Ki yêyè ne: “Mêmè kumukolesha, mwânà wa balùme mwîmpè.” Yêyè ne: “Mmukendè ne balundà babi’s, mpaasàtà wanyi. Mmupetè disaamà dibi,” ki yêyè ne, “nyawù mulàale muntu mwâmwa

ùpùnga ne lufù. Ùdi ùpùnga ne lufù kwènjì matùkù matwè ku àbìdì mpindyewu. Kí mmupingànekù nànsha mu yéyè yo kwènjì matùkù àbìdì. Ngàngàbukà mulùme ùkaavwa mwab'ewu ne mwambè ne: 'Kèna mwà kwikala ne mwoyi to,' yéyè ne, 'ùdi ùpùnga ne lufù.'" Cìvwa ndìsaamà dyà bwendèndà, nudi bamòné's. Yéyè ne: "Ncìvwakù mwà kwitaba bwà kumòna mwanàanyi ùfwa to, nènku ki mèmè kusambila bufùkù bujimà." Ki yéyè ne: "Mèmè kwamba ne: 'Mukalenge,' mwàkambàye, 'mèmè ewu's mvwa mukàjì wa bwena mukàjì mwena Suunè mà awu, kàdì' yéyè ne, 'Elishà Webè awu ùdi penyì's?'"

223 Ki yéyè ne: "Mèmè kuya mu tulù ne kulòòta cilòòtà, cyà ne mvwa mwimàne mwab'ewu ku ciibi eci, ki mèmè kukumòna wenda upweka ne mùsèèsù mwasè kafulu kakesè aku kenze bu kasendamija ku mutu." Kàdì yéyè ne: "Kùdi cintu ànu cìmwèpelè," yéyè ne, "aci cidì penyì . . ." Yéyè ne: "Wèwè's udi ne cyà kwikala ne mushèètè wà bilàmbà mu cyaanza."

Mèmè ne: "Ndi mfùma ku diwùshiya ku Cilààla-beenyi cyà Peabody kwàka."

224 Yéyè ne: "Mvwa mumanyè ne wèwè uvwa ne cyà kwikala ne mushèètè wà bilàmbà." Ki yéyè ne: "Mwanàanyi's nyawù ùpùnga ne lufù."

Mèmè ne: "Dìna dyànyì m'Branham."

Yéyè ne: "Ndi ne disànkà dyà kutwilanganakù neebè, Mpaasàtà Branham."

225 Mèmè ne: "Ntu nsambidila babèèdì. Ukààtukù muumvwè bàmba bwà mudimu wànyì wà bwambi anyì?"

226 Yéyè ne: "Bwàlà, ncyèna ngeela meeji ne nkààtukù muumvwè to." Yéyè ne: "Kàdì kwìnàku mwà kubwela anyì?" Ki mèmè kubwela.

227 Mulùmyàna munène awu mulàadika mwab'awu mùshindù awu's. Mvwa nteeta bwà kumwambila bwà dyondopà dyà kùdì Nzambì, kàdì kì ng'aku kùvwà èndè meeji to. Ùvwa yéyè muswè kuumvwa mwànà awu wàmba ne "wàsùngidiibu ne mukùmbànyine kuya." Ki kwambayè...Ki Nzambì kumusungila's.

228 Ki bu cidimu cijimà paanyimà nànkù awu mèmè kumumòna kuntwaku bu mwambudì wa mabùkì ku ngàlà. Mùshindù mwinè wùdì Mukalenge wènza maalu's wè!

229 Ki pashìshe pàngàakaalukilà, paanyimà pàà cyòcì aci, mvwa ne cyà...ndèkè awu ùvwa ne cyà kuumuka pa dībà mwandamutekète, kàdì's tukàavwa twipacila ku dībà citèema ne citùpà. Ki mèmè kwangata tàksì è kwalukila. Ne ndi mwenzè ànu mbwela anyì, ki bàmba ne: "Dibìikila dyà ndekeelu bwà dibùùkà dyà ndèkè dyà nòmbà *kampàndà*." Mukalenge wàkalamina ndekè awu panshì apu pàncìvwà muyè kasambidila mwànà wa balùme awu apu. Nwamònu anyì? Ki cyòcì aci's.

<sup>230</sup> Mvwa nteeta bwà kwela meeji ku, ku kaamusambu kakesè kàà ne: “*Umwe Wabò.*” Ki cyòci aci. Kaa, mùshindù mwinè wutùvwà tuwimba kale wàwa mwab’ewu ne mēyì matèekela pa mùsonga, ne tutuuta bikàshì. Tuvwa twamba ne:

Umwe wabò, umwe wabò,  
Ndi ne disànkà dyàbùngì dyà kwamba ne ndi  
umwe wabò; (Àlèluuyàh!)  
Umwe wabò, ndi umwe wabò,  
Ndi ne disànkà dyàbùngì dyà kwamba ne ndi  
umwe wabò.

Bàvwa badisangishe mu cibambalu cyà kuulu,  
Bònsò bàsambila mu Dìna Dyèndè,  
Bààkabàiiijibwa ne Nyumà Mwimpè,  
Ne bukolè bwà mudimu kulwabù;  
Mpindyewu cyàkabènzelaYè ditùku adi  
Yèyè neàkwenzèlè byà mwomùmwe,  
Ndi ne disànkà dyàbùngì dyà kwamba ne ndi  
umwe wabò.

Umwe wabò, umwe wabò,  
Ndi ne disànkà dyàbùngì dyà kwamba ne ndi  
umwe wabò;  
Umwe wabò, ndi umwe wabò,  
Ndi ne disànkà dyàbùngì dyà kwamba ne ndi  
umwe wabò. (Mmùdì pèèbè anyi?)

<sup>231</sup> Tèèlejààyaaku eci citùminyi:

Nànsha mùvwà bantu aba kabàyi bafwànyine  
kwikala balongè to,  
Anyi bàditàmbisha bwà luumù lwà pa buloba,  
Bààkapeta bònsò Mpenta wabò,  
Babàtìijibwe mu Dìna dyà Yesù;  
Nènku bàdi bàmba mpindyewu, ne kule ne ku  
nseke,  
Bukolè Bwèndè bùdi ànu bùmwebùmwe abu,  
Nènku ndi ne disànkà dyàbùngì dyà kwamba  
ne ndi umwe wabò.

Kaa, umwe wabò, ndi umwe wabò,  
Ndi ne disànkà dyàbùngì dyà kwamba ne ndi  
umwe wabò;  
Umwe wabò, kaa, ndi umwe wabò,  
Ndi ne disànkà dyàbùngì dyà kwamba ne ndi  
umwe wabò.

Kaa, lwàku’s, mwanèètù wanyì, ùkebè  
dibènesha edì  
Dyàkezulà mwoyi wèbè ku mpèkaatù,

Nedìbangè kudidisha ngonga yà disànkà  
 Ne nedìlamè musùùkà wèbè wùlàkuka kapyà;  
 Kaa, s'ki kwoshakù mpindyewu munda mwà  
 mwoyi wànyì eku's,  
 Kaa, butùmbì kùdì Dîna Dyèndè,  
 Nènku ndi ne disànkà dyàbùngì dyà kwamba  
 ne ndi umwe wabò. (Nudi ne disànkà dyà aci  
 anyì?)

Umwe wabò, umwe wabò,  
 Ndi ne disànkà dyàbùngì dyà kwamba ne ndi  
 umwe wabò;  
 Kaa, umwe wabò, umwe wabò,  
 Ndi ne disànkà dyàbùngì dyà kwamba ne ndi  
 umwe wabò.

<sup>232</sup> Kaa, kanwènaayikù ne disànkà anyì? Tùlabulanganàayi ànu  
 ku cyanza muntu ne mukwèndè patùdì tuwimba apu. Nudi  
 nwamba bishi? Tùcyènzàayi.

Umwe wabò, umwe wabò,  
 Ndi ne disànkà dyàbùngì dyà kwamba ne  
 ndi... (Ndi pàanyì ne disànkà dyàbùngì,  
 mwanèètù.)

Kaa, umwe wabò, umwe wabò,  
 Ndi ne disànkà dyàbùngì dyà kwamba ne ndi  
 umwe wabò.

Kaa, lwàku's, mwanèètù wanyì, ùkebè  
 dibènesha edì  
 Dìikalà . . . mwà kulàkusha musùùkà ne kapyà,  
 Nedìbangè kudidisha ngonga yà disànkà  
 Nedìlamè musùùkà wèbè ùlàkuka kapyà;  
 Kaa, s'ki kwoshakù mu mwoyi wànyì eku,  
 Kaa, butùmbì kùdì Dyèndè . . .

Twèlàayi byanza byètù muulu.

. . . ne disànkà dyà kwamba ne ndi umwe wabò.

<sup>233</sup> Bónsò cyàpàmwè:

Umwe wabò, umwe wabò,  
 Ndi ne disànkà dyàbùngì dyà kwamba ne ndi  
 umwe wabò;  
 Ndi umwe wabò, umwe wabò,  
 Ndi ne disànkà dyàbùngì dyà kwamba ne ndi  
 umwe wabò.

<sup>234</sup> Tèelejàayaaku cyàkàbìdì ne ntèmà mpindyewu, nwamònu's.

Nànsha mùvwà bantu aba kabàyi  
 bafwànyine—bafwànyine kwikala balongè

to, (Kabàvwakù bapàtùkile mu cilongelu  
citùmbùke nànsha.)

Anyi bàditàmbisha bwà luumù lwà pa buloba,  
Bònsò bàakapeta Dibènesha dyàbò dyà  
Mpenta,

Babàtìjìbwe mu Dìna dyà Yesù;

Nènku bàdi bàmba mpindyewu, ne kule ne  
ku nseke, (Mu ditumba dyònsò ne disangu  
dyònsò.)

Bukolè Bwèndè bùcìdi ànu bumwèbumwè abu,  
Ndi ne disànkà dyàbùngì dyà kwamba ne ndi  
umwe wabò.

235 Kaa, wímbààyi's, èkèleeziyà!

. . . wabò, umwe wabò,

Ndi ne disànkà dyàbùngì dyà kwamba ne ndi  
umwe wabò;

Kaa, umwe wabò, umwe wabò,

Ndi ne disànkà dyàbùngì dyà kwamba ne ndi  
umwe wa- . . .

236 Angàtà kaamùshwâlà kèèbè kakesè aku mpindyewu.

Umwe wabò, umwe wabò,

Ndi ne disànkà dyàbùngì dyà kwamba ne ndi  
umwe wabò;

Kaa, umwe wabò, umwe wabò,

Nènku ndi ne disànkà dyàbùngì dyà kwamba  
ne ndi umwe wabò.

237 Mukalenge àtumbè! Amen! Tudi ànu mùdi bânà amu's.  
Cintu nànsha címwè cyà byà kwísùkwísù abi kutùdi twètù to.  
Nzambì kàtu ne byà kwisùkwísù abi to. Mmwómò anyi? Èyowà's,  
mukalenge!

Ndi umwe wabò, umwe wabò,

Ndi ne disànkà dyàbùngì dyà kwamba ne ndi  
umwe wabò;

Ndi umwe wabò, umwe wabò,

Kaa, ndi ne disànkà dyàbùngì dyà kwamba ne  
ndi umwe wa- . . .

238 Udi cyà bushùwà ne disànkà dyà ne udi mwà kucyàmbe  
anyi? Elà ànu cianza muulu cyanàànà, wámbe ne:  
“Mukalenge àtumbè!” [Disangisha didi dyàmbe ne: “Mukalenge  
àtumbè!”—Muf.] “Mukalenge àtumbè!” Ndi ne disànkà dyà  
mùndi umwe wabò! Ndi ne disànkà dyà kwikala nànku's.

239 Mukalenge Nzambì, ndi ne disànkà dyàbùngì. “Umwe wabò,  
umwe wabò, ndi ne disànkà dyàbùngì dyà kwamba ne ndi  
umwe wabò.” Èyì Nzambì, tùkwàcishèku bwà twikalè cyòci  
aci. Tùkwàcishèku bwà tùlamè Makènke mateemè, Mukalenge,  
patùdi twenda tuya batàngile ku Sìonà apa. Enzàku nànku,



Taatù. Mu Dìná dyà Yesù, tudi tuKulàmbula nsòmbelu yètù bwà mudimu. Amen. Amen.

Kaa, tudi twenda batàngìle ku Siònà,  
Kaa, Siònà mwìmpè kumòna, mwìmpè  
kumòna;

Tudi twenda tubànda batàngìle ku Siònà,  
Cimenga cilenga cyà Nzambì aci.

Lwâyi, twètù bàdi banangè Mukalenge abu,  
Ne tùleejààyi masànkà ètù,  
Tudìsangààyi mu musambu ne cyonà cilengèle,  
Tudìsangààyi mu musambu ne cyonà cilengèle,  
Nènku mùshindù awu tùnyungulukilè Nkwasa  
wa butùmbi  
Ne . . .

Kaa, imbààyi ànu mu Nyumà's wè!

. . . Nkwasa wa butùmbi.

Kaa, tudi twenda batàngìle ku Siònà,  
Siònà mulenga kumòna, mulenga kumòna  
awu;

Tudi twenda tubànda batàngìle ku Siònà,  
Cimenga cilenga cyà Nzambì aci.

Kaa, tudi twenda batàngìle ku Siònà,  
Siònà mulenga kumòna, mulenga kumòna;  
Tudi twenda tubànda batàngìle ku Siònà,  
Cimenga cilenga cyà Nzambì aci.

Lekèlaayi abu bàbengè kwimba  
Bàdi kabàyi bamanyè Nzambì wetù abu;  
Kàdi bàna bàà Mfùmù wa mu Dyulu abu,  
Kadi bàna bàà Mfùmù wa mu Dyulu abu,  
Bàdi mwà kwamba masànkà àbò too ne  
pambèlu,  
Bàdi mwà kwamba masànkà àbò too ne  
pambèlu.

240 Tùwìmbààyi!

Tudi twenda batàngìle ku Siònà,  
Kaa, Siònà mulenga kumòna, mulenga  
kumòna;

Tudi twenda tubànda batàngìle ku Siònà,  
Cimenga cilenga cyà Nzambì aci.

241 Kaa, aci kacỳènakù cikukezula anyi? Kanwènaayikù banangè misambu ya kale ayi anyi? Ndi—ndi njinga kwikala naayi yôyi ayi pamutù pàà yònsò yinùdì mwà . . . anyi yà mîngà mishindù yà misambu yinùdì mwà kwikala naayi ayi. Yôyi ayi mmìmpè, misambu ya kale yà mu ndòndò wa mwoyi ayi. Kaa, ekelekele! Mèmè ntu ndyùmvwa bìmpè be ne disànkà dyà kacya

pantù nyimba, ànu bîmpè menemene! Ekèlekèle, ndyùmvwà ànu mwikàle ncyònkomoka!

Angàtà Dìnà dyà Yesù wëndè naadi,  
Wèwè mwànà wa tunyinganyinga ne dikènga;  
Nedìkupè disànkà ne busàmbi,  
Kaa, ndà naaDì, kwònsò kûyaayà.

Dìnà dyà mushinga, (Dìnà dyà mushinga!) Éyì  
dyà bupòle be! (Éyì dyà bupòle be!)  
Ditèkemena dyà bulòba ne disànkà dyà Dyulu;  
Dìnà dyà mushinga, Éyì dyà bupòle be!  
Ditèkemena dyà bulòba ne disànkà dyà Dyulu.

<sup>242</sup> Patùdì twinyika mitù yètù mpindyewu apa:

Twinamina Dìnà dyà Yesù,  
Tupòna mikookwela ku makàsà Èndè,  
Mfùmu wa bamfùmù mu Dyulu netùMwasè  
cifulu cyà butùmbi,  
Pààjikà lwendu lwètù.

Dyà mushinga . . . (Udi muswè  
kutangalajangana anyi?) . . . Éyì dyà bupòle  
be!

Ditèkemena dyà bulòba ne . . .



*NZAMBÌ KÀTU ÛBÌÌKIDISHA MUNTU KU CILUMBÛLWIDI  
KÀYI MWANJÌ KUMUDÌMWIJA DYÀMBEDI TO* LUA63-0724  
(God Doesn't Call Man To Judgment Without First Warning Him)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù dilòòlò, dyà 24 à ngondo wa mwandamutekete, cidimu cyà 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)